

四庫全書

史部

欽定四庫全書

史部

關中奏議卷五

詳校官侍講臣法式善

編修臣裴謙覆勘

總校官進士臣繆琪

校對官中書臣王家賓

謄錄舉人臣武先振

欽定四庫全書

關中奏議卷五

明 楊一清 撰

巡撫類

一為易置主將以保固地方事

兵部覆題該本部送於兵科抄出巡撫陝西等處地方
兼督理馬政都察院左副都御史楊一清題臣巡歷陝
西沿邊軍衛城堡閱視軍馬多非素練之兵或弓矢器

械之不習或坐作進退之不知其間勇健壯丁又多困
億身無完衣而備冬人馬狼狽尤甚詢其所以蓋因近
年領軍官員以操練為故事以科歛為得策遇冬主將
巡邊各枝各隊輳辦銀兩官則或馬或幣獻其所有軍
則或糧或草任其侵剋至於河開將放每軍歛銀一二
錢謂之卸甲驛站所過料草不支本色謂之打乾頭目
虛張聲勢打點過送以為孝順將官佯若不知端居坐
受以為當得承應不及而筭楚隨之錢物到手則諸事

不問故凡把總管隊等官但知媚上豈復顧下但求免
禍豈暇恤軍以致軍日貧馬日耗武備日弛職此之由
去冬河套侵犯勢甚危急鎮守武安侯鄭英統兵固原
不聞揚兵耀武之謀仍為剋科聚斂之舉夫三軍之命
皆係於將驅冒水火蹈白刃之人而奪其衣食戕其肌
膚使之懷憤積怨深入心骨倉卒遇敵其不渙然離散
者幾希矣况望其捐軀效死以成尺寸之功哉臣觀陝
西武臣非無善戰之人沿邊營伍亦多敢死之士要在

主帥得人智者效謀勇者宣力士氣自倍兵勢自張今
鄭英所至邊官解體上下離心勇氣索然怨聲載道夫
將官如有折衝禦侮之才摧堅陷陣之勇則貪可使詐
亦可使如往時劉寧輩既取其長當棄其短若鄭英素
無謀勇聞敵怯懦弘治十四年聞大舉之敵侵犯固原
嬰城自保不敢出戰彼時到鎮未久猶為可辭去年十
二月及今年正月殘寇累次侵掠不聞設一籌策運一
方畧所至則徵兵自衛坐費芻糧以致敵騎出入自由

如蹈無人之境所謂有是病而無是德者將安用之傳
曰君不擇將以其國與敵也朝廷柰何以全陝重地而
畀之斯人不早為易置擇人而任之待其債事貽患雖
置之重典亦無益矣臣竊聞近日聲勢猖獗尤非前比
冬間如不悔過遠遁必又踏冰入套臣受命經畧練兵
蓄糧信賞必罰作新士氣訪用人材愚臣事也若擁衆
內侵總率官軍衝鋒出戰乃將官之事臣本書生安能
辦此已將應設遊擊緣由具奏但主將之任尤為機要

所關查得先該總制尚書秦紘奏稱傳聞敵衆要從延綏西路入搶西安府地方欲將西安四衛原擬固靖備冬官軍暫留一半在西安府城內與延寧二邊備禦下班官軍行令鄭英嚴謹操練候將來相機戰守以保人民一節正恐伊巡邊有害無益故為此言以阻其出耳不然豈有身為主帥專守一鎮城之理況敵衆欲寇西安必由環慶固原而入延綏相離地遠山川阨塞豈能飛度所謂因噎而廢食者此論是也議者或又欲於固

原添設副總兵一員提調各邊人馬然既有鎮守主將
又添副總兵不無官多人擾且副總兵既以提調各邊
人馬為職則主將徒擁虛名置之無用亦恐未通但固
靖環蘭緊隘地方數多若得常守之將委的事有統紀
武備自嚴軍威自壯臣廣詢博訪熟慮深思誠得易置
相應鎮守主將一員就於固原常川駐劄則官不加多
事為有益伏望聖明念全陝疆土之重憫生民塗炭之
急乞勅兵部議擬上請合無將鎮守陝西武安侯鄭英

行取回京別推驍勇知兵善撫軍士在內如都督楊玉
神英輩在外如吳江曹雄輩將官一員鎮守陝西等處
地方節制諸軍常川固原駐劄提調防守遇警往來各
邊統率官軍盡力勦殺則邊方可保無虞邊方安則腹
裏安矣陝西城內自有鎮守巡按都布按三司官員臣
今往來經畧以後巡撫未免多住鎮城不待將官保障
如果事情十分寧息邊方無事主將仍回鎮城駐劄另
行具奏定奪臣於鄭英素無睚眦直以地方安危所繫

利害切身若因循隱默忌避不言則欺君負國之罪萬死莫可自贖等因具本該通政使司官奏奉聖旨兵部知道欽此欽遵抄出送司查得近該鎮守陝西地方武安侯鄭英奏伏念臣本一介菲才荷蒙先帝聖恩不以為愚不肖授以藩鎮之寄自臣到鎮以來迄今四載夙夜憂惶莫能補報臣見年五十七歲筋力已衰况舊患痰疾因去歲邊方侵凌騷擾欽奉勅諭隨宜策應欽此欽遵正臣子効勞之時臣疾雖在身待報躬親統兵往

來截殺但邊地風寒致將前疾舉發至今用藥調治百無一効又加半身頑麻不能騎射若不辭解兵柄緣臣所守實為三邊根本重地倘遇有警恐悞朝廷大事如蒙伏望聖恩憫臣在邊染疾容臣回京調理另推謀勇將官前來代臣管事臣干冒天顏不勝戰慄之至等因具本該通政使司官奏奉聖旨兵部知道欽此欽遵議奏間今該前因案呈到部看得巡撫都御史楊一清奏稱陝西地方軍務廢弛鎮守官員不堪厥任誠恐臨期

悞事要將武安侯鄭英行取回京別推驍勇知兵官一員前去更替鎮守陝西地方專在固原駐劄及武安侯鄭英亦自奏患不能騎射乞要回京調理緣關中係國家重地主將實官軍司命況近來情勢比昔不同萬一冰凍入套必須防禦得人合無俯從所奏將鄭英取回候命下之日本部就將楊一清所薦官員另行議擬奏請簡命一員前去代替鄭英鎮守陝西令其常在固原駐劄撫安軍士遇警勦殺防守地方不許仍往省城復

蹈前轍緣係更擬將官及奉欽依兵部知道事理未敢擅便弘治十八年十月初四日本部尚書劉大夏等具題本月初五日奉聖旨是鄭英取回京欽此欽遵擬合通行為此除外合洛前去煩照本部題奉欽依內事理欽遵施行

一為慎固地方以遏邊人事

兵部覆該本部送於兵科抄出巡撫陝西等處地方兼督理馬政都察院左副都御史楊一清題准兵部洛前

事該本部題該寧夏鎮巡等官太監葛全都御史劉憲等各題稱陝西遊兵三千員名已經革去遊擊將軍合無仍設將官統領前來兩界韋州往來駐劄外可以策應花馬池內可以保障固靖等處地方等因該本部看得未審前項人馬見今改調何處應用合行臣查明定奪等因題奉欽依備咨到臣查得先該總制尚書秦紘奏於環慶固原等處添設遊擊將軍弘治十七年九月間該巡按陝西監察御史季春奏要裁革兵部依擬題

准行移陝西鎮巡等官行令遊擊將軍都指揮楊敬照
舊回司所統遊兵俱令掣回原營以後地方如或多事
仍該復設遊兵另行具奏定奪等因備咨前來已經欽
遵將原選遊兵掣回原營間續因邊報拆牆進入韋州
螺山住牧侵犯固原環慶軍馬不敷鎮守武安侯鄭英
隨將前項遊兵調取前來分委都指揮陳善黃正管領
防守後日事寧仍照原擬掣回臣接管巡撫受任經畧
因慮前項地方委的人馬寡少敵情難測原選遊兵若

盡數掣散有警急難收拾除西安等衛及環慶官軍掣
回原營外其洮岷河臨四衛官軍又經委官重復挑選
精銳人馬共一千一百員名暫委都指揮管領策應莊
浪見在蘭州地方駐劄又於洮岷秦平等衛原擬備冬
官軍內挑選一千餘員名委官管領操練聽調正慮河
套為患遊擊之官恐當復設故為先事料理一旦用之
但得統領之人兵可立集不然直待敵至方議設官有
官方議選軍經時累月緩不及事臣之鄙見如此今寧

夏鎮巡等官太監葛全等所奏要將陝西遊兵三千員
名仍設將官統領一節蓋亦以為陝西遊擊當設又因
裁革未久故為此言以俟廟堂采擇臣請究竟本末言
之寧夏花馬池興武營清水營直抵高橋兒等處地方
乃河套出入之門戶然彼之所入雖經於寧夏而其所
利則在於腹裏寧夏如能捍禦使之不敢拆牆而入則
腹裏可以無患但恐地方散漫墩堡稀疏士馬單弱不
能遏其方張之勢彼既拆牆進入必將抄我環慶犯我

固原深入我安會靜寧隆德諸處內有監牧馬匹尤為
素所窺伺加之土漢雜處易於生變一失保障則根本
動搖故延寧為手足之疾其禍速而小環固乃心腹之
疾其禍遲而大尚書秦紘原擬推選宿將充遊擊將軍
操練軍士用防不虞深為有見但當時委任非人致招
物議又因邊事稍寧議者遂謂官多人擾奏行革罷未
及兩月潛師竊發分抄邊鄙無處寧帖守備等官各有
信地彼衆我寡徒閉壘以自全分疆畫界至相望而不

救於是衆論囂然蓋謂遊擊不當革遊兵不當散方議
奏復而邊情已寧矣臣謂兵無常形事有萬變因時制
宜固難執一奏設遊擊者乃安內攘外之圖奏革遊擊
者亦省事惜費之意也今敵得志而驕冬間難保不入
河套萬一拆牆深入數必不少陝西遊擊將軍似當復
設隨處應援截遏以安人心且諸鎮一體如大同遊兵
應援宣府延綏遊兵應援大同寧夏遊兵應援延綏則
陝西設有遊兵既可保障內地亦可為延綏寧夏緊急

之援不為無益既設之後不宜亟罷庶使事有定規人有定志但添官非難得人為難任非其人平時恣為剝削臨事安可倚仗非惟來議者之口抑且壞地方之事博采得守備固原署都指揮僉事陳善老成歷練慣戰知兵平時撫士有方遇敵當先不怯且歷官年久山川道路險易熟諳使當折衝禦侮之任則兵將相知地利人心兩得可責成功如蒙乞勅兵部再行詳議如果陝西遊擊相應復設合無將陳善奏請充遊擊將軍將原

選見在官軍二千員名聽其統領仍在慶陽駐劄不拘
環慶固原靖邊蘭州等處但有緊急聲息往來應援截
殺若尚在河套不曾拆牆進入照依寧夏鎮巡官所擬
前去韋州等處與延寧遊兵犄角併力防禦倘或大同
宣府一有緊急延綏官軍調去城堡空虛地方有警聽
各該鎮巡官行臣處相機調發前去策應前項官軍缺
少馬匹於各監苑補賠倒失虧欠兒扇馬內給領不必
照依各鎮搶兌以致損此益彼兩相妨碍以後如果各

處地方寧息秋夏時月將官軍放回原衛休息遇冬徵調聽用永為定規不必暫設亟罷使人懷苟簡事無成效若任非其人訪有貪污怯懦實跡巡撫巡按官指實劾奏革退別選相應之人代補及照固原地方最為要害守備官員不可暫時缺人如臣言可采陳善果蒙委用就乞於陝西武臣曾經舉保堪用官員內推選一員代替守備庶幾地方有託緩急不至悞事等因具本該通政使司官奏奉聖旨兵部知道欽此欽遵抄出送司

查得陝西固原等處遊擊先該巡按陝西監察御史李春奏稱官多人擾本部已經依擬奏革續該寧夏鎮巡等官奏要將革退遊兵照舊設官統領以備內外策應本部又經議奏行令查勘去後看得巡撫陝西都御史楊一清奏稱勘報前項遊擊將軍應該復設緣由所言地方利害興廢始末議論詳悉事體明白及處置該集遊兵該用領兵將官俱各停當況今寧夏見報邊情緊急用人預備合無准其所奏請勅原擬都指揮僉事陳

善充遊擊將軍名目統領前項遊兵三千員名專在環慶固靖等處往來截殺仍聽鎮巡官員節制調度此後尤須守法奉公正已率下慎終如始以副委任合用符驗旗牌照例請給差人賣去本官應用其固原地方今既擬令鎮守武臣常在彼處駐劄所據陳善守備員缺不必再補合止行令都御史楊一清徑自照例選委堪用都指揮或指揮一員在彼備禦緣係添設遊擊官員及奉欽依兵部知道事理未敢擅便弘治十八年十月

初八日本部尚書劉大夏等具題本月初九日奉聖旨
是欽此欽遵擬合通行除外合咨前去煩照本部題奉
欽依內事理欽遵施行

一為傳報聲息預防邊患事

兵部覆該本部送於兵科抄出巡撫陝西等處地方兼
督理馬政都察院左副都御史楊一清題據暫署守備
蘭州地方蘭州衛指揮僉事陳松呈云云等因節呈到
臣照得鎮守太監劉雲武安侯鄭英俱在陝城臣看得

蘭州地方自本年五月十一日以來傳報莊浪紅城子
炮火柴堆聲息絡繹不絕訪得敵衆俱在莊浪後山伏
同兒水彬草溝等處劄營節次入境搶掠因是近來莊
浪人馬寡少動輒失利以此彼勢愈張我威愈挫況與
蘭州壤地相接無關隘溝塙之限莊浪既已被搶蕭索
虎狼無厭之欲必將窺伺蘭州已將原奏留甘蘭二衛
官軍李勤等摘撥分布河北地方東路鹽場堡西路鐵
子坪二處按伏防守遇警截殺但鐵子坪舊無城堡鹽

場雖有舊堡不曾修蓋房舍不堪屯軍又經行令兵備
守備等官量起本處軍民人夫築打鐵子坪城堡一座
及於鹽場堡修蓋官廳營房以便官軍屯住及又遵照
節該欽奉隨宜斟酌調度成命行委都指揮黃正管領
洮岷臨河等衛官軍一千員名前去莊浪暫聽分守叅
將蘇泰調遣殺敵指揮郭遡督率所領土兵亦於蘭州
駐劄隨其聲勢所向往來應援外緣莊浪雖係甘肅所
轄而與陝西腹裏聲勢相倚臣實不敢顧此失彼但往

年莊浪紅城子力足捍禦北人不敢越境南侵則蘭州
似為腹裏今莊浪已不能支衆劫肆行剽剝無忌根本
喉襟之地所繫尤重若彼窺覘糾結日久不退則陝西
官軍急當內防勢恐不能分兵外援且秋冬將臨北方
大衆難保再不入套前項郭逆黃正所領軍馬乃固原
環慶緊關禦敵之數又當先期掣回休息養其銳氣以
挫敵鋒臣又切思莊浪之人橫遭兵禍已非一日訪得
前項敵衆初本不多近來鳩集醜類日漸繁夥恒在莊

浪涼州地方明水湖等處佳牧假我逋降為之鄉導不時突出鈔掠聲東擊西倏來忽去委的難以隄防其勢非大遭挫衄則不肯遠遁將來勾引羌戎寧夏陝西二鎮皆受其毒不止莊浪之害而已夫田中之禽利用搏執聖王所不得已如蒙乞勅該部詳擬合無行甘肅鎮巡等官行令遊擊率領所統遊兵或再推驍勇都指揮一二員摘發甘州各衛招募土兵舍餘軍餘等項二三千名前來莊浪紅城子協同叅將等官戰守以紓地方

目前之急其陝西發去官軍取回固原環慶等處以備
北人入套之謀再乞預行寧夏甘肅陝西守臣密切會
議若是今冬寧謐不入河套明年春二三月草枯馬弱
之時遣人哨探住牧處所的確諸鎮各選精兵甘肅官
軍自莊浪涼州分道並進以殺其勢寧夏軍馬出其後
背以邀其歸陝西官軍自蘭州掎角而入以防其衝突
必痛加誅剿以洩數年兵民之憤一勞永佚計無出此
舍是弗圖因循玩愒苟度歲時如養癰疽不施鍼砭使

其日漸潰蝕雖有知者不能善其後矣此事重大必仗廟堂成算詢謀僉同乃可舉動愚臣一人之言豈可自以為是但承乏經畧調度之任有所見聞不敢自默等因具本該通政使司官奏奉聖旨該部知道欽此欽遵抄出送司案查先為敵衆擁衆犯邊缺兵戰守事該分守莊浪地方左叅將蘇泰奏稱敵衆節次犯邊兵力寡少乞要增兵戰守等因本部已經議擬題奉欽依備行陝西鎮巡官將聲息少緩地方或附近各衛官軍內轉

撥精壯一千員名委官管領前去莊浪聽調殺敵指揮
郭遡原管土兵一千員名領去蘭州地方駐劄以便莊
浪固原兩處策應續該巡撫甘肅等處地方右副都御
史畢亨奏為易將官以安邊境事該本部議擬題准將
副總兵把琮改調莊浪遊擊將軍徐謙帶領所部遊兵
常在莊浪駐劄聽把琮調用俱經通行去後今該前因
案呈到部看得都御史楊一清所奏極言河西敵衆屢
為莊浪之害又慮冬臨河套入寇固原環慶所當戒嚴

計處各鎮分設防禦之兵甚為得策除遊擊將軍徐謙
領兵駐浪駐劄已有前議外合無依其所擬本部一面
鋪馬費文與都御史楊一清徑將所屬郭邈等原領蘭
州等處策應軍馬掣回聽其調用一面費文甘肅鎮巡
等官查調各衛招募土兵舍餘二三千推委謀勇都指
揮一二員帶領前往莊浪紅城子等處隨同副總兵把
琮等防禦中間事宜或有未盡未允亦要從長議處以
固地方其稱今冬寧謐不入河套欲候明春草枯馬弱

之時密會三鎮誅勦明水湖等處積年犯邊之敵尤見
經畧深遠但事干重大難以遙度而甘肅寧夏二鎮守
臣未經謀議恐亦各有所見況掩襲境外之敵必須兵
馬加倍精強將帥謀勇兼濟方能措手一或言動欠密事
機先露恐難成功合無仍行陝西并甘肅寧夏鎮巡等
官密切移文會議從長再加斟酌如果此舉有利無害
詢謀僉同時勢可乘不貽後艱會同奏報相機舉行務
要計出萬全以期克捷如果事有異同難便輕舉或別

有安邊良策亦要明白回奏緣係守臣建言邊務及奉
欽依該部知道事理未敢擅便弘治十八年十一月十
二日本部尚書劉大夏等具題本月十三日奉聖旨是
欽此欽遵擬合通行除外合咨前去煩照本部題奉欽
依內事理欽遵施行

一為急缺領軍官員事

兵部覆該本部送於兵科抄出巡撫陝西地方兼督理
馬政都察院左副都御史楊一清題臣受命經畧巡撫

節奉欽依或廣收人物以資其方畧或重懸爵賞以鼓
舞人心等因備咨前來為照禦戎莫急於練兵練兵莫
先於選將將非其人兵雖衆不足恃將得其人怯可化
勇弱可化強廣收人物誠備邊第一義也況今北人得
志而驕冬深難保不入河套近日環慶地方節次傳報
炮火聲息防禦不可不嚴陝西各該守備將官皆新任
可用但各有信地難以摘撥至於管領備冬官軍及召
募土兵民壯等項調遣委用不可缺人本處都指揮把

總指揮等官才局雖有可觀多是不曾經戰倘或敵衆大舉侵犯使之衝鋒破敵恐未必能近該臣奏保緣事都指揮烏銘充軍指揮楊宏荷蒙皇上湔洗楊宏重罪止降二級聽臣隨宜委用天地再造之恩凡為武臣孰不感激思奮但烏銘兵部題稱已經奏取赴京難又別為定奪及又博訪得先任花馬池叅將西安後衛指揮馬隆蘭州衛指揮同知楊義俱各熟閑戎務諳曉邊情先年慣經戰陣比之新進未試者不同亦該本部奏取

京營領軍去訖且京營領軍所係尤重臣何敢以一方之事致妨天下大計但京師人材所聚如烏銘輩必多大同宣府聲息已寧陝西之患方自茲始況此三人用之陝西則地利素知人心素服不違其材可責其効若領京營士馬恐亦無以逾人伏望聖明垂念關中三邊根本之地防禦事重用人為急乞勅兵部合無將烏銘馬隆楊義三人仍發回陝西聽臣隨宜委用統領備冬官軍及土兵召募義勇民壯等項併力勦殺或分守要

害或策應各邊有功具奏推陞誤事責不輕貸待後陝西地方寧靖大同宣府聲息緊急京營領軍缺官該部移文行取仍督發前去應用等因具本該通政使司官奏奉聖旨兵部知道欽此欽遵抄出送司查得先為軍務事該巡撫陝西都御史楊一清奏奉欽依事理咨送馬隆等前來又該本部議擬題奉欽依將馬隆楊義俱陞署都指揮僉事與烏銘協贊鼓勇等營去後今該前因案呈到部看得都御史楊一清題稱要將烏銘馬隆

楊義發回陝西聽其委用統領備冬官軍及土兵等項
堵截勦殺待後京營領軍缺官仍督發前來應用一節
照得烏銘等先因宣大二鎮聲息緊急故將各官取來
聽候領兵即今二鎮稍寧況陝西地方目今河凍正係
敵衆侵犯之時用人尤為緊急相應准其所奏除數內
馬隆已該本部題奉欽依充四川叅將協守松潘地方
去訖所據烏銘楊義合無着令馳驛前去都御史楊一
清處聽調領兵若後京營要用另行具奏行取各官務

要竭忠奮勇圖立後功以副舉用之意緣係奏討領軍
官員及奉欽依兵部知道事理未敢擅便弘治十八年
十一月二十二日本部尚書劉大夏等具題本月二十
二日奉聖旨是欽此欽遵擬合通行除外合咨前去煩
照本部題奉欽依內事理欽遵施行

一為預防邊患以保固地方事

兵部覆該本部送於兵科抄出巡撫陝西等處地方兼
督理馬政都察院左副都御史楊一清題近准巡撫寧

夏地方本院右僉都御史劉憲咨為大敵入套請兵防
禦事弘治十八年八月二十九日據番中走回男子賈
羊羔兒供係山丹新河人失記衛所年月日七八歲時
被小王子部落頭兒巴罕搶去邊外牧放牛羊一十三
年見在賀蘭山後駐劄近聽得夥裏衆人說稱俱往迤
北迎接小王子到來本日又據套內迤北石嘴兒墩暖
泉兒墩夜不收王文奴等報稱本日巳時瞭見河西相
離黑山營四十里地名野馬川等處敵衆下營人馬不

計其數帳窠牛羊遍野內有三百餘騎前來河邊住立
吹觥策一聲向東觀望頓飯時回營去訖本年九月初
四日又據石嘴兒墩夜不收王玉等報本月初三日辰
時瞭見敵人五騎在於套內到於墩邊荅話不應顯是
前項大敵浮水渡河入套等因前來會同鎮守太監葛
全總兵官署督僉事李祥議看得前項敵衆訪是小王
子入馬在大同搶回意欲過套入攻先是走回男子賈
羊羔兒報稱山後衆人前去迎接小王子次據夜不收

王文奴等報稱瞭見河西敵衆不計其數內有三百餘騎前來看河今夜不收王玉等又報瞭見敵衆五騎已過套內事果不虛五騎既已過河誠恐醜類源源而來大舉入寇旦夕難保若不請兵策應防範慮恐臨期難便除具題外擬合通行知會等因備咨前來續據守備環慶等處地方署都指揮僉事姚震呈為傳報烽火事弘治十八年九月十四日酉時據原差花馬池探聽聲息夜不收魏玉供報本月十二日夜三更時分有花馬

池夜不冰張外頭報稱煖泉塋石噴兒塋各舉火六把
行間本月十六日辰時據環縣城西西河塋守瞭小甲
王友走報本時瞭見永河塋舉煙三把十七日又據西
河塋小甲王友報火六把又據本官呈前事弘治十八
年九月二十七日巳時據環縣城西西河塋守瞭小甲
王友走報稱沈家山塋小甲唐仲義傳報火三把煙三
把等因節呈到臣照得鎮守陝西太監劉雲武安侯鄭
英俱在陝城鄭英見今患病不出除移文知會外看得

巡撫寧夏都御史劉憲咨稱前項邊情係供報之言固難盡信但環慶地方已有傳舉境外煙火必是此敵將謀入邊先遣輕騎浮渡黃河潛入套中瞰彼窩巢覘我虛實踵襲故智侵犯邊境無厭之欲誠難窺測先事之防不可不謹切詳敵兵去年侵掠陝西今當皇上龍飛御極之初乃敢侵我宣府擾我大同戕賊我士馬魚肉我生民貪得無厭何所底止若再擁衆內侵鼓我積憤之兵乘彼既驕之勢何戰不克何向不前顧部落結聚

動稱數萬我邊地里寬漫分兵而守無所不寡以十當百似難急嬰其鋒惟在嚴封疆守要害明斥堠謹禁防以佚待勞俟機而動延寧二鎮邊備各該守臣必能先事經理陝西固靖環慶地方先該總制尚書秦紘修築邊塹一道甚於保障有益所患墩堡稀疎聲援隔絕故副總兵曹雄有固原之牆不如無牆之論臣今近牆設墩傍險增堡聲勢相接况填塞溝塹坍塌邊牆次第修補粗皆就緒至於分布人馬使守要害招集土人使自

為戰不敢漫易以速罪尤但當久玩極弊之餘人馬寡少又復不精語及戰功臣實不敢自保然而形勢戰守得失利害之機亦嘗籌度寧夏花馬池興武營直抵高橋三百餘里地方在北是為侵我邊境之門戶陝西環慶固原直抵靖邊七百餘里地方在南是為入我腹裏之門戶中有山城萌城石溝鹽池韋州等處乃敵兵出沒經由之道路然彼之所入雖由寧夏而其所利實在腹裏寧夏邊牆如能捍禦則腹裏可安枕而臥稽

今事勢恐未必能倘一旦拆牆而入必以精騎守所入之路綴我官兵使不敢南則腹裏安危所係至重其故不可不講也敵既深入剽掠方張之勢恐非陝西官軍所能當藉諸邊鎮遊兵協力捍禦庶免生民荼毒然欲成克捷之功必在乘其既弊而於中路擊之為便查得臣節該欽奉勅諭倘或事情緊急延寧莊涼遊兵俱聽爾調用欽此欽遵及照延綏叅將王戟所領土兵二千員名亦係兵部題准聽臣調用之數但寧夏遊兵僅能

自守莊涼遊兵彼處四時有警在在乏兵恐難摘調緩
急所倚惟延綏遊奇兵叅將王戟土兵應援之力臣雖
奉有成命竊恐諸鎮官軍各有統屬不即聽調悞事非
輕且今西安等府旱災至甚流徙在途萬一時勢危急
邊城失守盜賊乘隙而起根本動搖誠非細故况延寧
遊奇兵調去大同未回近聞彼處聲息已寧若不早為
掣取直待寇至門庭方纔移文往來之間動經旬月委
的緩不及事如蒙乞勅該部計議合無鋪馬費文行令

延綏副總兵曹雄遊擊將軍羌漢叅將王戟作急將所
領官軍寧回曹雄奇兵暫於定邊營駐劄以便延寧兩
邊策應羌漢遊兵王戟土兵於花馬池興武營等處按
伏如果敵衆入套擁衆近邊與寧夏副總兵衛勇叅將
霍忠協同保勘靈州守備焦洪并都指揮韓斌等人馬
併力捍禦保固邊牆不令入境寧夏總兵官李祥統領
人馬過河暫於靈州駐劄以便河南調度陝西亦選遊
兵三千員名暫於韋州按伏以為聲援且以防今冬山

後乘凍渡河侵犯之謀若是聲勢重大力不能支拆墻入境勢必侵犯腹裏陝西遊兵即當掣回豫旺城防禦延綏遊兵土兵聽臣臨期相機調取應援亦在保固邊墻不令拆入彼進不得逞居無所獲不久亦將自退若不能阻遏長驅而入勢必分散我軍堅壁清野據險以乘之伺便以圖之縱無大得亦無大失仍先以曹雄李祥衛勇姜漢等各枝精兵分布中路山城萌城石溝鹽池紅寺兒韋州一帶城堡按伏秣馬藏鋒蓄銳多遣乖

覺夜不收遠為哨探彼既深入日久人馬疲敝計其歸途必出前路陝西將官統領官軍徐躡其後毋逼而追待入我穀諸路之兵併起而夾擊之陝西官軍奮而逐之或邀其中或截其尾胸背受敵必敗之道獻俘折馘大功可期計不出此而欲於拆牆之處邀其歸路其勢復合其援亦近成敗利鈍非臣所知再照暫留莊浪左副總兵魯麟驍勇慣戰歷練老成所統土兵番人素所畏服先年腹裏有警亦曾調用乞勅本官整櫛人馬倘

或事情緊急聽臣移文調來固原環慶等處與陝西將官協力戰守以壯兵勢以繫人心此臣一得之愚敢用預陳以備采擇乞下陝西延寧諸鎮將官參酌行之隨機應變又在各官仍乞速行曹雄姜漢王戟等各以腹裏根本為重遇調慎勿延緩以失事機等因具本該通政使司官奏奉聖旨兵部知道欽此遵欽抄出送司查該先為守邊防患地方等事該協同鎮守甘肅左副總兵魯麟奏稱統兵前往寧夏等處截殺得患痢疾况伊

男年幼管下土人家口缺人鈴束乞要暫留在家教訓
伊男管束土人家口本部議擬題奉孝宗皇帝聖旨是
魯麟准留莊浪撫管土人寫勅與他欽此續為易將官
以安邊境事該巡撫甘肅都御史畢亨題稱左副總兵
魯麟父祖以來世守莊浪番人素所畏憚今雖養病在
家尚能發縱指示乞要請勅本官今後遇有敵衆侵犯
務要運謀設策併力勦殺等因該部議擬具題奉聖旨
是欽此節經請勅本官欽遵外近為大敵入套請兵防

禦事該寧夏鎮巡官太監葛全等題稱大同地方寇已
寧息要乞行令本鎮副總兵衛勇延綏副總兵曹雄遊
擊將軍姜漢叅將王戟各將前項遊竒等官人馬火速
兼程前來花馬池等處併同本鎮人馬布置按伏相機
截殺已該本部議得合無鋪馬賁文與寧夏太監葛全
總兵官李祥都御史劉憲一面選差乖覺夜不收遠為
哨探一面嚴督副總兵衛勇叅將霍忠協同保勦守備
焦洪都指揮韓斌等各要用心設策整糊人馬隨宜按

伏以逸待勞本部仍行延綏守臣令叅將王戟統領土
兵前往花馬池遊擊將軍姜漢統領遊兵前往定邊營
曹雄統領奇兵前往寧塞營各要星馳前去秣馬按伏
聽候有警併力截殺乃行陝西巡撫都御史楊一清公
同固原新任鎮守將官斟酌形勢計議方畧分布腹裏
人馬據要防禦督調本處遊兵相機策應等因具題奉
聖旨是欽此又經通行各該鎮巡官欽遵去後今該前
因案呈到部看得巡撫都御史楊一清歷究陝西寧夏

地方之要各鎮官軍戰守之宜及指陳乘敝邀擊之利
論議反復籌度周悉除延綏遊奇官軍與寧夏副總兵
衛勇等所領人馬已該本部題奉欽依通行各該地方
戰守亦與本官前項議奏之意大畧相符所據慮恐諸鎮
官軍各有統屬不聽調遣合無行移延綏鎮巡等官轉
行副總兵遊奇等查照先令事理如果敵已西行本鎮
別無聲息陝西來調兵馬即便依期前去分布防守不
許遲延誤事自取罪尤仍通行陝西延綏寧夏鎮巡等

官俱要協心運謀相機而動務使功成萬全事無一失
圖免陝西腹裏之害用紓皇上西顧之憂毋得秦越自
分坐觀成敗以孤委任其稱莊浪左副總兵魯麟慣戰
老成邊人畏服先年有警亦曾調用乞要請勅本官整
楸人馬遇警調來固原環慶等處與陝西將官協力戰
守一節尤為有見蓋魯麟久在邊方委實謀勇頗優於
衆今病痊可相應責成合無本部鋪馬賣文與都御史
楊一清轉行左副總兵魯麟將所領土兵嚴加操練固

守地方若遇固原環慶有警即聽都御史楊一清移文
調用大功有成陞賞不吝不許託故偷安以負朝廷世
寵之恩緣係巡撫官員奏處防守邊務及奉欽依兵部
知道事理未敢擅便弘治十八年十一月二十四日本
部尚書劉大夏等具題本月二十五日奉聖旨是便行
與各官着用心協力相機防禦不許自分彼此致誤事
機欽此欽遵擬合通行除外合洛前去煩照本部題奉
欽依內事理欽遵施行

一為預防邊患事

兵部覆該巡撫陝西等處地方兼督理馬政都察院左副都御史楊一清題准兵部咨該協守延綏等處地方副總兵都指揮僉事曹雄題稱陝西固原等處近來修築邊塹一道南離固原二百五十里北離花馬池四百餘里敵經花馬池之空深入任其掏挖通不知覺向使固靖地方有久守之將則戎馬之入何以似蹈無人之地為今之計合無固靖環蘭等處添設副總兵一員提

督操練有警臨鞏秦平官軍悉聽調遣黃河將凍時月
收斂人畜肅清郊野分兵要害秣馬蓄銳以待敵至萬
一邊敵復來侵犯或乘其分散或邀其歸路其陝西鎮
守將臣精選在城有馬官軍前來以為聲援如此則戰
守兩備責任專一緩急有濟等因具本奏奉孝宗皇帝
聖旨兵部看了來說欽此欽遵該本部覆奏行巡撫陝
西都御史楊一清會同巡按監察御史從公計議陝西
鎮守將官每年冬初例該前去固原等處防守今若於

固靖環蘭等處添設副總兵一員必得練達邊務曾經
戰陣者常川在彼委的有益但省城鎮守將官遇冬所
理何事必須何以處之斯於事體穩便經久可行務在
議處停當會奏前來以憑上請定奪等因題奉聖旨是
着議處停當來說欽此欽遵備咨到臣會同巡按監察
御史季春從公計議看得陝西固原環慶靖邊蘭州皆
緊關要害之地固原土漢雜處內有監牧馬匹所係尤
重河套有警寧夏邊牆失守則固原環慶最先受害近

來山後殘敵河凍時月多從寧夏中衛鳴沙州一帶踏
冰而入竊伏螺山等處鈔掠固靖突來忽去不止河套
為當隄防至於蘭州河北一帶節被莊浪明水湖潛住
諸番與山後之敵無分春夏不時侵擾又不止河凍為
當備禦比者各該地方戰守之具名存實亡守備等官
權任輕微莫能自展各有信地不相應援陝西鎮守將
官遇冬至十一二月方纔提兵西向不過月餘河冰消
釋即便掣回與調來客兵無異山川之險夷關隘之虛

實將領之勇怯士卒之強弱茫不與知上下相安因循度日邊備不嚴兵威不振職此之由今聲勢猖獗大非昔比萬一不肯悔過遠遁糾合部黨長驅深入則內郡繹騷根本動搖不止邊民受害而已若得常守之將駐劄固原提督操練各路人馬遇警分兵要害調遣應援截殺委的責任專一曹雄所言蓋亦有見其要添設副總兵一員不無官多人擾況人馬有限添官雖多何補於事且既設副總兵提督調兵則主將徒擁虛名置之

無用亦恐未宜若將陝西鎮守將官移來固原駐劄則
官不加多事為有濟長久利便之策宜無過此議者或
謂陝西鎮守之設兼防南山羣盜然陝城已有鎮守太
監巡撫巡按都布按三司又兼撫治巡守等官平時自
足防制果有盜賊竊發將官東還不妨勦捕但任法不
若任人安內乃可攘外使任非其人反生厲階致招後議
竊見鎮守陝西武安侯鄭英在鎮年深近又自稱患病
日久不出見今寧夏已有傳報聲息倘或邊衆擁衆侵

犯本官委的不堪征戰誤事非輕必須更易相應將官鎮守緩急方可倚仗如蒙乞勅兵部計議上請合無將武安侯鄭英行取回京別推京營都督或邊鎮將官廉靜不擾練達戎務曾經戰陣一員鎮守陝西等處地方常川固原駐劄提調防守遇警往來各邊統率官軍勦殺堵截外壯兵勢內繫人心實為便益當此久玩極弊之餘正易轍改絃之日伏望聖明軫念關中重地一方兵民不宜重遭荼毒早賜施行等因與巡按監察御史

各具本該通政使司官奏奉聖旨兵部知道欽此欽遵
通抄送司查得先為預防邊患事該延綏副總兵曹雄
奏稱固原邊牆曠遠要於固靖環蘭等處添設副總兵
提督操練本部議行巡撫都御史楊一清會同巡按御
史從公計議固靖環蘭等處添設副總兵一員常川在
彼委的有益務在議處停當會奏前來以憑上請定奪
等因題奉聖旨是着議處停當來說欽此已行欽遵去
後續為易置主將以保固地方事該都御史楊一清奏

稱陝西地方軍務廢弛要將武安侯鄭英行取回京別
推驍勇將官一員前去更替鎮守陝西地方專在固原
駐劄等因前來本部依擬將本官奏內薦舉都督等官
楊玉等四員具題奉聖旨是曹雄陞署都督僉事鎮守
陝西地方欽此已行欽遵去後今該前因案呈到部看
得各官所奏固原等處地方添設副總兵一員不無官
多人擾若將鎮守將官常川固原駐劄則官不加多事
為有濟一節既查有本部前項題奉欽依鎮守官員常

在固原駐劄事理別無定奪擬合通行除外合咨前去
煩為查照施行

一為急處救荒事

戶部覆該本部等衙門會題於戶科抄出欽差巡撫陝
西等處地方兼督理馬政都察院左副都御史楊一清
題前事准戶部咨該陝西鎮巡等官題切照陝西地方
接連邊境糧草徭役比之他處實為浩繁茲者又遇前
項蟲旱等灾米價騰貴人民流移誠為可憫難以照常

勘處合無不為常例本部移咨都察院轉行巡按陝西
監察御史公同都布按三司守巡管糧官嚴督府衛州
縣掌印官一面將被災地畝從公覈實一面將該免錢
糧照依分數先行除豁仍將除豁過田地税糧等項有
收無收分數各備造文冊奏繳仍造清冊一本送部查
考本部再行巡撫都御史督同守巡管糧等官嚴督府
衛州縣各該官員查勘缺食軍民先儘見在預備倉糧
按月放支賑濟如有不敷就將該庫收有見在銀兩等

件設法糴買米穀作急賑濟務使人沾實惠事有成效
此外別有救荒事宜徑自區處施行事體重大者作急
具奏定奪等因具題奉聖旨是陝西災傷重大着楊一
清好生設法賑濟毋致失所欽此欽遵備咨到臣查得
陝西災傷地方西安府為甚延安府次之慶陽鳳翔二
府又次之其餘平漢臨鞏等府雖間有旱雹等灾分數
不多但西安一府財賦供億實當七府之半西安府告
荒雖七郡全收不足以補况延慶邊郡亦復有灾他府

稍登僅能自給已將被災地方應該分豁減免稅糧緣
由節次具題及行委分巡分守等官各帶領府佐能幹
官員分投徧歷所屬州縣先將極貧人戶今冬開倉驗
口給糧賑濟次貧人戶明春一體賑濟如倉糧不敷聽
將官銀折放去後茲者仰荷聖慈該免稅糧准行巡按
御史覈實除豁天語叮嚀又以設法賑濟責成愚臣惟
恐斯民失所古帝王之用心不是過也顧臣撫巡無狀
不能導引和氣以厘宵旰之憂若又不能仰承明詔講

求賑濟方畧坐視溝壑轉徙而莫之救其罪安可逃哉
查得各該州縣預備倉糧多者不過萬餘石少則三二
千石甚至止有數百石陝西布政司查報在庫官銀八
萬三千餘兩俱該供邊并折支俸糧布花之數尚恐不
敷亦難動支糴買糧米夫以堂堂巨省而倉庫空虛至
此臣晝夜思之寢食俱廢竊惟救荒以賑濟為先以儲
蓄為本陝西地方關山環峙舟楫不通重以供給三邊
賦役繁重故一年之收僅足以周一年之用加以頻年

兵荒瘡痍未復卒遇久旱遂成大饑閭里蕭條逃亡接踵盜賊間起剽掠潛行困敝艱難莫可名狀又恐春夏之交米價益貴民食愈難官廩既空官銀莫措餓夫張口以待哺官司束手而無施民窮盜起勢所必至若麥秋有望猶可支持萬一套衆不出二麥不登賑濟轉輸兩無所賴公私告急內外俱困倉皇狼狽何可勝言臣又竊思陝西成化十九二十年間旱荒彼時承平之餘倉庫有積又無邊患尚且賑貸不敷餓莩填渠人至相

食後蒙憲宗皇帝准開救荒事例措置銀糧甚多又將江南漕運糧米數十萬石差官由漢江及河南地方二路轉運移民就食賴以全活而死徙之民已不可救戶口耗彫至今未復今公私匱乏既非昔比邊疆騷擾又昔所無若明年歲果不登將來事變豈直如成化年間而已及今多方區處尚為臨事有備然糴買既苦於無資開例復拘於犯禁安能忍心坐貽後悔行據陝西布按二司左布政使柳應辰右布政使羅鑒按察使謝瑩

等會同將議處區畫錢糧及停免追徵等項事宜開呈
前來臣參酌衆論之中求濟一時之急敢用昧死上陳
伏望聖明省覽乞勅該部大臣參詳可否議擬上請早
為施行庶幾續民命於垂絕奠疆土於無虞關陝安則
天下安京師安實宗社萬億年無疆之休也臣不勝激
切俟命之至等因題奉聖旨戶部知道欽此欽遵抄出
送司案呈到部看得都御史楊一清題稱陝西西安等
府地方荒歉太甚人民饑窘條陳區畫救荒八事要行

叅詳可否議擬上請早為施行一節緣前項事情重大
多係別衙門掌行本部難擅定擬合無會同五府六部
都察院通政司大理寺堂上官并六科十三道掌科掌
道官公同議處上請定奪本年正月十六日具題次日
奉聖旨是欽此欽遵會同太師兼太子太師英國公張
懋少師兼太子太師吏部尚書馬文升等議得關陝地
方外隣強敵內困供億比年邊鄙多警民不聊生官司
庫廩在在空竭徭役科派處處疲弊加以年穀不登赤

野千里目今外寇深入大肆搶掠夫以窮迫垂死之民
遇此兵荒相仍之歲人心搖動他變必作正當先事而
慮庶幾保無後愆都御史楊一清身歷目覩心切憂勞
條陳數事乞早施行言雖急迫事實可采昔人謂救荒
莫如備荒盖以此耳臣等切思天人一理相為流通灾
祥感召捷於影響揆厥亢旱之由實由乖氣所致况關
陝喉襟重地尤當加意撫卹大布惠澤以救倒懸之厄
用消意外之虞奈何國家多事帑藏虛耗生財之源既

塞而不行軍需之費多缺而不繼近者各邊賞賜尚欠大半其宣大二鎮奏討糴買糧草銀兩極力措辦不及三分之一言及於此良可寒心臣等伏覩累朝以來公私匱乏未有甚於此時者也今將本官原擬八事酌處上請伏望聖慈軫念生民俯賜鑒納崇實德以消天變守清儉以裕國用臣等不勝惓惓憂畏激切之至緣係會議急處救荒事理未敢擅便正德元年正月二十五日本部尚書韓文等具題本月二十九日奉聖旨是陝

西邊方灾傷重大賑濟為急這議處事宜都准行鹽法
你每再議來說欽此欽遵擬合通行為此除外合咨前
去煩照本部題奉欽依內事理欽遵施行

關中奏議卷五

欽定四庫全書

關中奏議卷六

明 楊一清 撰

巡撫類

一為地方事

兵部覆准禮部咨於禮科抄出巡撫陝西地方兼督理馬政都察院左副都御史楊一清題准兵部咨該本部題前事照得各處巡撫等項都御史舊例在邊方者四

月在腹裏者八月俱該赴京議事其遼東宣府大同山西延綏陝西寧夏甘肅俱與敵境相隣見今達衆不時出沒正在用人之際不可暫時缺人督理合無行移巡撫等官今年俱免赴京議事各在地方修舉本等職業若有重大應議事件明白預先條陳差人齎奏照依舊例經該衙門會議奏請施行等因題奉欽依備咨到臣除將陝西重大地方事情另行具奏及瑣屑常事應該自處者不敢一一煩瀆聖聽徑自從宜處置外今將事

干各處地方益于政體宜于軍民不係見行事例該載者條陳數事乞勅該衙門會議倘有可取奏請施行等因題奉聖旨禮部知道欽此欽遵抄出備咨送司案呈到部看得巡撫陝西等處地方兼督理馬政都察院左副都御史楊一清所奏後開事件俱係裨益軍民有關政體重務應合逐一議擬開列前件上請定奪緣係地方及奉欽依禮部知道事理未敢擅便正德元年二月初一日本部尚書劉大夏等具題次日奉聖旨准議欽

此欽遵擬合通行為此除外合咨前去煩照本部題奉
欽依內事理欽遵施行

計開

一復馬夫舊例查得洪武年間舊例在外司府州縣
官員俱有欽給馬匹僉選中等三丁民戶每馬一
匹定撥十戶計人丁三十丁出備草料輪流養馬
如馬倒死就令各戶買補行之百三十年並無別
議後因不才貪官需索馬夫供給數多弘治七年

該御史建言兵部奏准比照柴薪皂隸定議出銀
則例每戶四兩十戶共銀四十兩給與各官自行
買馬及雇人餵養弘治十四年間又該給事中建
言本部奏革去銀二十兩每戶出銀二兩共銀二
十兩仍送各官自買草料餵養馬匹如有倒死申
稟上司支給在庫官銀買馬是皆因時救弊之術
未為不善奈何新例既行所得銀兩收為橐橐中
物誰肯支用且買草糴料紛紛與市廛交易亦多

不便至于餽飼未免屬之在官之人孰肯雇役久之有馬不復愛惜馬死不復買補人夫有擡轎之勞驛馬有借騎之勞不借之驛傳則借之里甲甚至又令里甲置買傘轎鞍轡及出草料餵馬者比比有之弊端橫出蓋至于今而諸司之馬廐空矣近又許令無馬者支給在庫銀兩買馬于是乞討之移文相望而買馬者十無二三在官之出給無窮而在民之勞費如故本以息民而反病民本欲

省費而反增費乃知我祖宗之良法美意不宜輕
議變更蓋不但此事為然耳況凡厥有官廉者恒
少不廉者恒多彼誠廉官必不需索馬夫銀物彼
誠不廉所取正亦不在馬夫而已需索馬夫財物
當坐贓罪彼猶不知警畏而謂擅騎驛馬私借里
甲馬匹有禁足以保其必不犯乎徒失朝廷優禮
臣下之意而顧有損于官民無益于政體邇者陝
西山東等處巡撫官各嘗具奏乞復舊規該部以

行之未久難又更改臣竊謂一法立一弊生因時制宜更之以復祖宗之舊無所不可此亦皇上初政率由舊章之一端也除陝西司府州縣官員前項弊端臣通行嚴加禁約訪察外如蒙乞敕兵部從長議處合無仍照洪武年間事例通行南北直隸并浙江等十三布政司將各官騎坐馬匹定撥中戶十戶每戶三丁共三十丁就令輪流在官餵養馬匹置買鞍轡若馬匹倒死各丁自行買補官

有事故陞調去任前馬收存新官騎坐此外但有一毫科索馬夫財物等項許巡撫巡按訪察輕則報以不謹重則叅提問罪罷黜如此官民實為兩便

前件查得在外司府州縣官每員撥市民三十丁買馬餵養以備官員騎坐此是洪武年間以來舊例近因言官建議更改納銀令其自行養馬法屢變弊愈滋本欲息民而反病民本欲省費而反增費

誠如本官所言者合無本部通行各該巡撫巡按
將納銀事例革去悉照祖宗舊例轆撥市民三十
丁置買馬匹鞍轡輪流餵養如馬倒死就令各丁
買補舊官去任前馬存留新官騎坐敢有餘外需
索馬夫財物分毫許被害之人指實具告巡撫巡
按官處應拿問者拿問應叅奏者叅奏施行

一定支應則例查得陝西鎮守太監處每日京兆驛
支應銀八兩四錢以一歲計之該銀三千餘兩鎮

守總兵處每日支應銀五兩六錢以一歲計之該銀二千餘兩通計二處歲該銀五千餘兩買辦油鹽醬醋柴炭所費未必如是之多況不時之需又有不在此數者乎以此該驛站糧價銀之取較之舊時其多數倍所司累欲裁減掣肘中止訪得各處鎮守衙門該驛支應輕重多寡不一然亦無有如陝西京兆之多者陝西往年支應亦無此數不知添自何時恐日後恃為合得月增歲益民何以

堪且陝西三邊經費所出大半仰給西安州縣兵
荒之餘奄奄喘息苛征浮費此其一端既往不須
深究方來當為之所除行陝西布政司查禁裁省
外誠恐各處亦有此弊輕重不均廉貪莫辨民受
其患不獨陝西為然如蒙乞勅該部查議各處鎮
守太監總兵等官除本等廩給外應否折支調和
蔬菜柴炭油燭等項價銀若干如果相應合無定
與則例通行遵守使廉者有養贍之資貪者無漁

獵之害敢有憑藉驕橫仍前額外勢逼威索者聽
巡撫巡按指實糾舉如此則站價可減民困少蘇
地方幸甚

前件查得祖宗舊制差使大小官員經過者日支廩
米三升有事地方者日支米五升連下飯油醬等
項俱在其內近年各處鎮守內臣或稱日用不足
別加柴肉鹽醬等項者然亦未聞有如陝西前項
之甚必是先該司府州縣驛遞不才官員止知承

奉小人不顧小民惠害日增月益以致如此況日
逐使客數多總計費用無算該驛庫子必至破家
陝西連歲天災此其咎徵一端也今該巡撫官奏
發相應查處合無本部移咨陝西巡撫都御史并
行巡按御史行令所屬州縣驛遞衙門今後本省
鎮守內臣除本等廩米五升外每日豬肉不得過
五斤雞不得過二隻柴七十斤炭二十斤油一斤
鹽醬各一碗燭三對小菜三樣若是逐日供送勞

攘十日半月總計聽從其便所司敢有仍前分外剝民脂膏曲意諂奉者許巡撫巡按官嚴加訪察拿問黜罷仍通行各處巡撫巡按查勘凡有不遵祖宗舊制濫取害民之事務要禁約改正若舊能遵守成法不許因此倣倣分外加增其餘公差官員人等并奏帶頭目等項該支廩給口糧悉遵舊制而行

一為地方事

戶部覆云云看得督理馬政都御史楊一清所題事件
係隸各衙門掌行擬合通行除外合就開咨前去煩為
徑自查照施行

計開

一稽考軍衛錢糧據陝西按察司提學副使王雲鳳
呈查得陝西西安左等衛除額設正軍之外有曰
寄名舍餘冬操夏放每年自十月至來年二月每
日口糧一升每月食糧三斗小月二斗九升若有

騎操馬者食糧一石本色六斗折色四斗每年布
二疋綿花一斤有曰抽選武備常操舍餘有馬該
糧一石本色六斗折色四斗布一疋花一斤無馬
止食糧六斗有曰舊招募義勇每月食糧四斗有
曰招募土兵即新招募義勇每年冬操每月食糧
三斗自十月起至次年三月止布一疋有曰屯軍
有馬食糧一石本色六斗折色四斗布二疋花一
斤八兩無馬每月食糧四斗每年十月起至次年

二月止布一疋花一斤八兩有曰起調護衛遺留
餘丁內投充常操者食糧一石本色六斗折色四
斗備冬者每年十月起每月本色糧四斗至次年
二月止中間又有逃而復回回而不行投首當差
却收糧而又逃者有死而勾補補而不當原差食
糧于別項下者其寄名屯軍禦冬備邊者十月內
起身赴邊之日隨身每日行糧一升五合在衛月
糧就該截日住支頭緒繁多未易悉數雖有智者

莫能卒解因此久慣識字人等及本所掌印千戶
遇闕支糧賞造冊之時作姦百端或將無馬混作
有馬或將冬操槩為常操或將寄名并屯軍赴邊
之後不行住糧及逃故不除姓名暫除旋捏見在
并詭名重名等項每年一衛盜支糧千餘石布千
餘疋軍士頭緒每衛亦不盡同陝西共該四十餘
衛所其弊殆不可勝計上司官員若非因人告發
安能得其肯綮間有知者又因人衆往往置而不

問即今在在倉庫空虛此亦所致一端近將查出盜支識字人役并衛所及該倉官吏治罪監追若不專官管理則民日飢而士終不可飽糧日進而倉終不可實及官軍俸糧折色錢鈔馬價均徭贓罰銀物預備倉糧并馬匹草料其弊類此合無差委按察司管屯官員兼管稽考所屬各衛所月糧布花馬匹草料及馬價錢鈔均徭贓罰銀物預備倉糧等項一應錢糧姦弊仍於本官勅書內載入

以便行事則每年當得數萬錢糧于侵盜之手軍
足食而姦弊革矣等因具呈到臣案查近該臣訪
得西安在城三衛官軍俸糧布花及在庫官錢多
被經該官旗軍吏人等盜支盜賣侵剋數多積弊
有年干碍人衆難盡稽考已經劄委按察司提學
副使王雲鳳會同管屯僉事胡經弔取近時卷簿
查究呈來施行去後續據各官會呈查出盜支倉
糧二千三百五十二石八斗一升七合折銀一百

三兩一錢七分三釐七毫銅錢八萬九千九百二十六文折色銅錢三千二百三文鈔三千五百一十貫侵尅賞賜冬衣布花大布七百五十四疋折花銀三十二兩七錢三分此外侵欺科斂求索局騙枉法等賊不止一端且據一時卷簿所查尚有此數歲復一歲所侵盜不知幾何近而省城附郭衛分尚有此弊遠而在外及各邊衛所其為弊不知幾何是皆百姓膏血之餘軍士不得實惠而徒

為姦人漁獵之資深可痛恨夫利之所在人必趨之錢糧出納之際姦弊易生固不止軍衛為然而軍衛為尤甚如前各項軍人頭緒如此之多該關糧賞則例不一至於備邊輪戍之數逃故不常該關該扣日異而月不同以至積年旗吏夤緣為姦不才官員通同作弊勢使然也此非細心稽查何由知其詳悉布按二司巡守管糧等官政務繁多案牘填委不無顧此失彼副使王雲鳳所呈欲委

按察司管屯蕪管稽考所屬各衛所錢糧姦弊不為無見竊恐此弊不獨陝西為然天下衛所大抵相同如蒙乞勅該部詳議合無通行南北直隸及各按察司各委管屯官員蕪管稽考所屬各衛所月糧布花馬匹草料及馬價錢鈔均徭贓罰銀物預備倉糧等項一應錢糧姦弊仍於本官勅書內載入以便行事其馬價均徭預備倉糧贓罰銀物等項錢糧俱委經歷專一經手經歷缺官知事署

印帶管經歷知事俱缺從管屯官暫委別衛首領
官或文職雜職官管理不許本衛徑委千百戶鎮
撫等官每年終將稽考查過軍衛錢糧姦弊拿問
過人犯開報巡撫巡按用以驗其職業修否其巡
守管糧等官仍要照舊詢訪稽考若有姦弊徑自
施行亦不許恃有管屯官專管推托不理如此則
弊端漸革軍食稍充而軍人不得肆志稔惡矣等
因備咨送司案查先為缺官事准吏部咨該本部

題准已經照例請勅一道付僉事胡經親賫前去
陝西按察司到任專一提督陝西都司所屬各衛
所管屯官員人等務要及時耕種完足屯糧禁革
姦弊去後續為分巡事該陝西按察司奏稱甘肅
地方添設僉事一員請勅往來甘肅等六倉并行
都司廣盈庫監督收放錢糧禁革姦弊兼管屯田
水利三年一換該本部題准又經請勅一道馳驛
賫付僉事官員欽遵於甘肅等六倉管理糧儲兼

管水利并提督陝西行都司所屬甘州一十五衛
所屯田務要倉糧無弊水利疏通屯糧及時子粒
完足各倉收糧官攢人等有弊各衛所管屯官員
軍士耕斂失時以致倉糧有虧子粒拖欠屯軍失
所水利壅滯應拿問者就便拿問應叅奏者具實
叅奏去後今該前因案呈到部看得都御史楊一
清奏稱陝西西安在城等衛官軍俸糧布花及在
庫官錢等項多被經該官吏人等盜支盜賣侵剋

漁獵積弊有年非止一端又恐此弊不獨陝西為然天下衛所大抵相同要行詳議通行南北直隸及各按察司各委管屯官員兼管稽考所屬一應錢糧姦弊仍于本官勅書內載入以便行事及各衛所錢糧俱委經歷知事掌管不許本衛所徑委千百戶等官一節深為有見合無依其所奏將各處管屯官員各另請勅一道將各該衛所月糧布花馬匹草料及馬價錢鈔均徭贓罰銀物預備倉

糧等項錢糧姦弊俱令兼管稽考不獨屯田水利
官吏旗軍人等有犯不分軍政掌印管屯管倉應
拿問者聽本官徑自拿問應叅奏者叅奏拿問其
馬價均徭預備倉糧贓罰銀物等項錢糧俱委經
歷專一經手經歷缺官知事署印代管經歷知事
俱缺聽該道守巡并管屯官選委別衛首領官或
文職官管理不許本衛徑委千百戶鎮撫等每年
終將稽考過軍衛錢糧提問過人犯數目開報巡

撫官驗其職業庶錢糧易於查考姦弊易於革除
緣係專官稽考軍衛錢糧事理未敢擅便正德元
年二月十八日本部尚書韓文等具題次日奉聖
旨是欽此欽遵擬合通行為此除行都察院轉行
浙江等十三按察司并南北直隸地方各管屯副
使等官將原領勅書差人徑自具奏更換外合行
備由移咨前去煩照本部題奉欽依內事理欽遵
施行

一為地方事

題為地方事准兵部咨該本部題前事照得各處巡撫等項都御史云云等因題奉欽依備咨到臣除將陝西地方重大事情另行具奏外今將事干各處地方不係見行事例該載者條陳數事乞勅該衙門照例會議可否奏請施行緣係條陳地方應議事件事理謹題請旨

計開

一維持憲體照得在內監察御史在外按察司皆風

憲官為朝廷耳目關國家元氣御史巡按一方吏治臧否民生休戚所繫其責尤重鋤貪祛暴乃其職任近年以來問發及奏劾文武官員多被反許毛舉細小過失撫拾不干已無根之詞輒蒙併勘查得見行條例文武官吏人等犯該為民等項罪名不分已未結正伸訴冤枉者准行辯理其有妄奏冤枉撫拾原問官員勘問涉虛原問為民者發口外為民原問充軍者發極邊衛所充軍前項禁

例不為不嚴但人安得無過既行併勘勘官意得
兩全往往遷就出脫奸人恣為得計夫人莫不好
榮而惡辱此風若行其不相率而為姑息避事者
鮮矣使風憲失職姦貪得志民受其害豈朝廷之
福哉且御史出巡回日自有本院考覈京官又有
十年一考察之例按察司賢否自有巡撫巡按開
報考語三年又有朝覲黜陟之典豈憑所問發舉
劾之人言詞以為輕重哉臣請今後監察御史按

察司官已經問發為民文武官吏人等及舉劾官
豪勢要人員果有冤枉止許將所枉之事明白開
陳奏訴照例行無碍衙門勘問辯理敢有撓拾原
問官員過失不拘事情輕重將原詞立案不行仍
查照原擬從重歸結庶可杜絕小人姦計而內外
憲臣皆得展布肆體以事其事矣

一稽覈新軍照得各處清理軍伍舊例各州縣委掌
印官各府委同知布按二司又各有堂上官一員

以總理之又勅遣監察御史一員以董其事三年
一換定與分數以驗功績立法防範可謂甚嚴然
行伍日見消耗邊堡未聞充實彼推移版籍埋沒
姓名變亂于里書之手莫之能稽者其弊固多然
有司歲所清解十常四五而衛所見在收役百無
一二蓋因原籍原衛相離地遠兩不相照清軍憲
臣但知此有清出解過之數又焉知彼無著伍應
役之實該管官旗既不依例存恤却乃任情作弊

有方出收管隨即得錢賣放者有將盤費搜索殆盡只得隨逃者亦有著伍之後被其侵尅糧賞百般科害貧不能存以致在逃者故批解方獲原軍已回今次解補之人即下次清勾之數以為常事以官司經年督責之勞小民闔門津貼之費殘民肌體剝民脂膏而徒為官旗漁獵之地深可痛恨及今不為之處將來其弊滋甚臣請令天下清軍御史清解州縣軍丁之外兼督察稽覈該管地方

衛所新軍先期通行各處清軍御史每年終將清
出南北直隸各布政司已解出軍人某衛若干某
所若干開造文冊差人分投賫送各該清軍御史
各該御史按臨但有衛所去處照冊比較查考如
某處冊開解補新軍某某該衛所不見投到即繫
原籍有司官吏里老故縱不解虛文搪塞如已解
到務拘本軍正身審問有無存恤剝削情由如正
身逃在即將該衛所官旗比較各行原該清軍御

史務追究出州縣容縱衛所賣放剝削實情應提
者提應叅者叅各從重問結其無清軍御史去處
按察司清軍官一體照例施行開報功績務將取
有衛所收管軍人方准作數仍乞將前項事宜增
入清軍御史欽奉勅內以便行事如此則事體相
須彼此相制人知警畏宿弊可以漸除行伍可以
漸充矣

一處置軍生歲貢據陝西按察司提學副使王雲鳳

呈照得天下各府州縣儒學歲貢皆于廩膳年深
數內考選惟都司衛所學校原無廩膳直于闔學
生員內論入學年深因此軍生既得入學多不讀
書苟歲考免于黜發則計日得膺歲貢提學官員
間有不論年深取曾經考中科舉者充貢然軍生
得與科舉者甚少恐致入學年深不曾科舉者老
于無用徒有不均之歎殊無振勵之意合無將天
下都司衛所學校照府州學廩膳名數從提學官

考定儲養挨次起貢號為挨貢名色仍不食糧該貢之年照例考選及歲考驗其問學消長以為去留如此則軍生有階級漸進自此始奮發讀書之志而應貢者皆精選素教勤學可用之人矣等因備呈到臣看得都司衛學因無食糧之例止以入學年深者起貢中間文學雖優籍名在後苟不得志于科場比老無階身之路委的賢愚同滯士氣無由振興欲令食糧則邊儲有限供給不敷若依

副使王雲鳳所擬將天下都司衛所學校照府州縣廩膳名數從提學官考定儲養挨次起貢號為挨貢名色仍不食糧如原繫一年一貢如府學者定為挨貢四十名四年三貢如州學者定為挨貢三十名兩年一貢如縣學者定為挨貢二十名該貢之年照例考選及歲考驗其學問消長以為去留如初考堪取挨貢不及前數不必拘泥止儘見在相應之人餘缺之以俟來考如此既可振勵人

才又不糜費糧餉乞勅禮部計議採擇施行

一為地震事

題為地震事據陝西布政司呈據慶陽府環縣申據本縣陰陽學牒呈據直日陰陽生郝雲呈照得本縣弘治十八年六月初十日癸亥約午時分忽從東北地震二次響聲往西南去訖搖動軍民房屋理合呈乞施行等因到學擬合就行為此合行牒呈本縣乞為轉達施行等因據此擬合通行為此今將地震緣由理合各另申

報伏乞照驗施行據此擬合通行為此除外理合備由呈乞照驗施行等因具呈到臣案查先據平涼府固原州申稱本年六月初十日午時正二刻地震緣由前來已經具題外今據陝西布政司呈備環縣申稱前項日時地震二次有聲搖動軍民房屋等因照得陝西固原環慶二處最為要害重地先年河套入寇不窺環慶必犯固原創傷困苦之餘生意未復今二處地方同日地震竊恐邊人侵伐之患或不能無且災變之來必有攸

自人事乖違則陰陽舛錯今一歲之中災異疊見地道不寧皆由百司庶職曠官怠事所致而臣濫總風憲不能奉宣德意振肅紀綱撫安兵民其責尤重除通行一體痛加修省及督令各邊關隘城堡嚴謹武備防禦邊患外緣繫地震災異事理謹具題知

一為旱災事

題為旱災等事據陝西布政司呈據西安府申備邠州并涇陽咸寧長安三原藍屋臨潼武功鄠縣申又據本

府所屬乾州并咸陽富平醴泉蒲城四縣申各據里老
趙剛等呈弘治十七年八九月間雨澤少降土脈乾燥
安種麥豆俱未長茂至弘治十八年三月內纔得微雨
麥豆正當吐花秀穗之時四月又旱無雨兼被狂風吹
刮不得堅實青乾無收其有收者多不過二三分即今
五月芒種時候為因無雨土乾秋田不得安種人民驚
惶無所依仰見今徵派稅糧委的辦納不敷必致小民
逃竄乞為轉達分豁便益等因各備呈轉申到司又據

延安府申備鄜綏葭三州膚施甘泉安塞保安安定清
澗延長延川宜川洛川中部宜君吳堡神木府谷米脂
一十六縣慶陽府申備寧州安化合水真寧環縣鞏昌
府申備隴西寧遠伏羌西和漳縣等州縣申并據西安
左前後延安慶陽鞏昌六衛及西安右甘州中二護衛
各呈同前事又據平涼府所屬靜寧州隆德莊浪靈臺
崇信四縣各申自本年四月十四日至二十等日連降
嚴霜致將麥豆殺傷多半又被日久無雨風吹日晒以

十分為率約有八九分枯死乞要分豁稅糧等因案查
先為處置災傷事承准戶部陝字四百二十四號勘合
該本部題合無通行天下司府州衛等衙門今後遇災
先行合干上司類總奏報委官之際務要親詣被災處
所從實檢踏不許因而受財聽囑以熟作荒一面行移
巡按御史及按察司官再行從公覈實將有災該徵該
免田糧分數定擬明白造冊奏繳本部再行斟酌區處
奏請免徵等因題准備行前來已經通行遵依去後今

據前因緣繫民情災傷事理合呈乞照驗施行等因
據此查得前項府衛州縣陸續申報前情到臣俱各相
同切照陝西各府衛地方供給三邊糧草重大差役浩
繁節因邊敵侵犯兼天年薄收饑饉逃亡生氣未復即
今欽命大臣處置邊儲催徵積年拖欠未完糧草幸得
年豐有收方可供辦今所在告報災傷夏田既多無收
秋成恐亦難望雖中間輕重不同虛實難保終是實有
災傷去處為多而西安府所屬附近州縣被災尤甚且

民惟邦本賦由民出今公私匱竭倉廩空虛各邊軍士張口待哺急之則有民窮盜起之憂緩之則貽後時失事之悔夙夜警惕不知所處除行陝西都布按三司轉行各該守巡等官親詣前項申報災傷衛所州縣選委隔別廉幹官員會同各掌印官從公踏勘如果災重即便多方設法賑濟毋令失所稅糧暫停追徵待具奏定奪若災不甚重將該徵稅糧酌量處分從輕改派折納或撥附近倉分上納其不成災及災輕去處糧草責令

依時追徵不許延捱失誤中間如有受財聽囑以熟作
荒情弊就便拿問取具踏勘過災傷輕重稅糧該徵該
免分數緣由回報另行具奏外緣繫地方災傷事理謹
具題知

一為旱災事

題為旱災事據陝西布政司呈據西安府申節據華耀
同邠乾商六州并咸寧長安高陵淳化渭南蒲城白水
永壽朝邑涇陽藍田郃陽華陰三原澄城臨潼興平武

功三水同官韓城醴泉咸陽富平鄠縣二十五縣申據
各該州縣人民田愷等各告稱境內地方弘治十八年
四月五月無雨夏田薄收稅糧辦納不前六月初旬纔
得微雨安種秋苗未及長茂自本月至八月初旬六十
餘日一向亢旱無雨又兼狂風晝夜不息官司竭誠祈
禱止獲微雨灑塵致將各民所種糜粟菽豆等苗俱各
吹晒焦枯秋成無望人民十分飢荒陸續逃移出外趁
食去訖糧草無從辦納乞為轉達合干上司踏勘分豁

賑濟撫卹等因備由轉申到司又據本府所屬洛南縣
延安府所屬綏德州并中部吳堡宜君米脂四縣慶陽
府寧州并真寧縣鞏昌府階州并文縣臨洮府蘭州鳳
翔府岐山郿縣二縣甘州中護并綏德蘭州山丹四衛
階州鳳翔二千戶所各亦申呈前事案查先為處置災
傷事承准戶部陝字四百二十四號勘合該本部題合
無通行天下司府州縣衛等衙門今後遇災先行合干
上司類總奏報委官之際務要親詣被災處所從實檢

踏不許因而受財聽囑以熟作荒一面行移巡按御史
及按察司官再行從公覈實將有災該徵該免田糧分
數定擬明白造冊奏繳本部再行斟酌區處奏請免徵
等因題准備行前來已經通行遵依去後今據前因照
得陝西延綏寧夏甘肅三邊并固靖環慶一帶倉場糧
草仰給八府人民輓輸而延安府就近供給延綏慶陽
府就近供給寧夏西安一府地廣糧多計其歲徵之數
將及通省之半遞年供給諸邊所賴尤重三府不收則

別府雖是全稔尚且所補不多況鳳翔府隣近西安縣
分旱與西安相同所司稽於申報其平漢臨鞏四府所
屬未報災傷州縣得雨亦遲必非全熟今西安等府人
民因見旱災異常米價騰貴流移就食者接踵于道查
其預備倉糧又俱存積數少官府帑藏類多空虛皆由
弘治十四年以來連遭邊患它運修邊等項糜費不貲
所致兼以陸地不通舟航民俗鮮尚儲蓄縱使傾倉出
賑亦難盡遏流亡若至來年春夏之間私糴官廩皆空

寧免相視轉死竊聞之救荒之政賑濟不如免糧蓋賑濟則人或容姦免糧則民沾實惠故賑濟雖未敢後而免糧尤所當先呈乞照驗施行等因到臣案查先據陝西布政司呈備西安等府州縣申報夏田災傷緣由前來已經具題去後今據前因查得前項府州縣陸續申報前情俱各相同及訪得西安府所屬州縣災傷尤甚竊緣陝西為天下重地西安一府又陝西根本重地三邊仰給多繫于此兵荒之後民窮財盡加以邊方多事

糧草催徵勢不可緩不幸亢陽為虐雨澤愆期夏麥既已不登秋田又失播種百姓嗷嗷流離載道延至明年春二三月青黃不接溝壑轉徙之患何可勝言方求賑卹事宜又苦倉無積蓄該司所呈賑濟不如免糧深為有見蓋邊儲固當急圖邦本尤須深植假令百姓逃亡失業向後邊儲愈虧所謂皮之不存毛將安附言之痛心但就中論之災傷不能無輕重人戶不能無高下惟在稽覈得實庶不虧官損民除行分巡分守委官驗踏

明白災重地方極貧人戶多方設法賑濟稅糧暫停追徵取具踏勘過災傷輕重稅糧該納該免分數回報另行具奏外緣繫旱災事理謹具題知

一為地震事

題為地震事節據陝西布政司呈據西安府同州郃陽縣申准本縣陰陽學牒呈據直日陰陽生張輅呈弘治十八年九月二十日巳正三刻不意從西北上地震響聲如暗雷動往東南去訖具呈到學轉呈到縣理合申

乞施行據此又據本州韓城縣申據本縣直日陰陽生
馬景彞呈本日巳時初刻從西南地震往東北去巳未
又震二次亦往東北去俱有聲又據延安府申據本府
陰陽學申據直日陰陽生張文達呈本月二十一日巳
時分本處地方從西北方向東南地震二次將軍民房
屋牆壁搖動又據本府洛川縣申准陰陽學牒呈據陰
陽生武政呈本月二十日巳時初刻忽然地震有聲如
風牆屋俱動頃刻方定又據慶陽府申據本府陰陽學

申據本學陰陽生張祿呈本日午正三刻忽從東南地
動往東北去訖本日戌初三刻仍前復動一次等因各
備申到司轉呈到臣照得鎮守陝西武安侯鄭英患病
會同鎮守陝西太監劉雲議查得陝西西安平涼等府
朝邑固原等州縣自今年二月以來地震有聲非止一
次節經具題及通行所屬司府州縣衛所官員修省去
後今前項府縣地方又節申地震有聲如雷如風搖動
軍民房屋一方地道在在不安是皆軍民愁苦之象兵

戈擾攘之徵臣等備員鎮巡不能督率諸司修舉職業以回天意其罪莫贖況西安延安慶陽三府所屬州縣今年俱被災傷人民饑饉流移不能聊生且密邇邊方警報未寧敵情難測除痛加修省及通行軍衛有司沿邊城堡賑卹饑荒撫安軍民修舉武備防禦邊患外緣繫地震災異事理謹具題知

一為處置災傷流移事

題為處置災傷流移事照得西安府所屬華耀同乾等

州咸陽臨潼三原渭南高陵華陰朝邑富平等縣地方
今年四五月間雨澤少降夏麥被晒枯死者多收成甚
薄六月七月一向亢陽不雨秋田不得安種間有種者
多不出土人民憂惶貧民無底業無手藝者往往扶老
攜幼逃入南山商洛漢中等處趁食自八月下旬以來方
纔得雨秋田雖已不救二麥幸皆安種人心稍安若得
今冬瑞雪霑足來春時雨調勻可無大患但奄奄喘息
之民即今已不能堪欲使通行賑濟倉糧有限恐明年

青黃不接之際無以為繼查得各處預備倉之設本為
凶荒之備見行事例量州縣大小里分多寡定擬積糧
數目以為勸懲及三年一次委官盤查立法非不嚴密
奈何有司官員多不留意于此且陝西頻荒大兵之後
民窮財盡供邊修邊等費徵斂不給勢難別項措置又
因折錢折銀之例行而贖罪抵價之糧遂少倉廩空虚
職此之由臣待罪巡撫外防邊患內憂民難夙夜驚懼
不知所處已經播告司府衛所州縣大小官員痛加修

省免盡職業省事節用一切工作悉皆停止一夫不許擅役一應浮費悉皆查革一錢不許妄用其人民十分貧難眼前不能存活者取勘的確就便驗口給糧不使失所及將各王府文武衙門官吏旗軍人等應支粟米照依時價折與銀錢存省見在倉糧以備明春賑濟并勸諭積有糧米得過之家照常放糶不許阻遏仍行問刑衙門經問有力人犯贖罪紙價暫照舊例納米以少充倉儲逃移人民分投差人招撫復業其貧病饑餓不

能即回者暫于南山所在州縣報名在官量為給糧賑
救免致填委溝壑待春暖稍蘇發遣回還與凡救災卹
患事宜應施行者徑自施行災重應免稅糧并重大事
情另行具奏定奪外緣繫處置災傷流移事理謹具題
知

一為慶賀事

題為慶賀事據西安府申承奉陝西布政司劄付抄蒙
臣案驗仰本府轉行同知任奎照舊管理捕盜事務另

委相應官員賫進慶賀表文如無相應堪委官員徑自
申稟定奪奉此案查先為前事已行同知任奎賫進今
奉前因查得本府同知沈理清軍通判梁國用管糧推
官田春理刑俱委徧歷所屬賑濟貧民惟有知府馬炳
然掌管印信再無空閒堪委官員理合申乞照詳定奪
等因到臣仰惟皇上嗣登寶位在外司府州五品以上
衙門例該行委堂上官一員賫捧慶賀表文投進除都
布按三司并各府州衛俱委堂上官一員賫進外查得

西安府原委進表同知任奎近因本府所屬州縣人民
飢荒流移盜賊生發本官繫撫民官已經行令暫且照
舊撫民捕盜以防意外之患別委相應官員賫進去後
今申前因臣切惟賫進慶賀表文乃臣子敬君之禮天
下之事莫重於此但西安一府外供三邊為陝西根本
重地奈何今歲夏秋田禾俱各災傷無收人民十分饑
饉扶老攜幼流徙他方盜賊乘機剽掠人心憂惶況河
凍在邇戎心驕橫難保不入河套為患萬一擁衆近邊

兵戈外擾人民內困根本搖動事變難測及查得近准戶部咨為旱災救荒事該陝西鎮巡等官具奏地方災傷緣由本部題奉聖旨是陝西災傷重大著楊一清好生設法賑濟毋致失所欽此欽遵臣受命兢惕不遑寧處即令分巡分守等官督委本府同知通判推官等官沈理等分投前去三十六州縣公同各掌印官查放倉糧銀兩設法賑濟及行同知任奎嚴督禁捕盜賊撫安流移地方廣濶尚慮顧理不周別無空閒官員堪以委

用倘或誤事關係不小欲待各官事完方纔賁進表文
又恐有誤慶賀之期如蒙伏乞聖明俯念地方事重保
障為急乞勅該部計議合無將西安府堂上官不為常
例俱存留在任整理前項事務行委首領官一員賁捧
慶賀表文投進惟復待地方人民稍安之日仍行堂上
官賁進不勝幸甚緣繫乞留官員賑卹人民保障地方
事理未敢擅便謹題請旨

一為考選軍政官員事

題為考選軍政官員事准兵部咨該本部題稱弘治十八年又及五年之期內外軍政官員例該通行嚴加考選每都司各要掌印一員佐貳二員等因題奉欽依備咨前來照得鎮守陝西武安侯鄭英患病臣會同鎮守陝西太監劉雲巡按陝西監察御史李春議查得陝西都司原選軍政掌印都指揮使楊敬佐貳都指揮僉事房懷把琮俱推陞去任看得陝西地方廣濶內連八郡外控三邊為根本機要重地都指揮使司管轄三十餘

衛所軍馬數多掌印官必得通敏老練之人然後事有
統紀人無玩易本司見有都指揮僉事費梁等用之佐
貳雖有可觀用之掌印則多不及推訪得原選軍政佐
貳今守備蘭州都指揮僉事房懷事體練達才識優長
陝西官軍素所信服且守備之任固在得人而都司掌
印一方兵政修否所關事體尤重緣繫兵部推舉奉勅
守備官員臣等難擅定擬如蒙乞勅兵部訪察合無將
房懷改任本都司軍政掌印使之約束官軍修舉兵政

就乞於陝西武臣中推舉相應官一員守備蘭州地方
嚴加防禦居重馭輕既適其宜安內攘外兩無所失不
勝幸甚緣繫推舉方面軍政掌印官員事理未敢擅便
謹題請旨

一為分理誣枉事

題為分理誣枉事據陝西按察司呈問得犯人孟統招
繫陝西西安府咸陽縣知縣弘治十五年九月失記的
日有在京錦衣衛周指揮帶領旗校前來陝西地方勘

事因遇冬寒各旗校共轆銀五兩央浼先任本布政司
左布政使文貴要買羊羔皮襖有文布政訪得咸陽縣
出產羔皮自合差人照依時價兩平收買為當不合輒
差已發落承差王機將前銀牌發本縣責令統亦不合
要得奉承上司就拘今在官皮行王祿并欽等一十九
名到縣并欽亦不合將今在官一般皮行王名并伊父
王志善弟王泰姓名俱供報在內統與先問發今未到
工房與吏淡友智各明知彼時時估大羔皮一張值銀

二分以上至二分五釐小羔皮一張值銀一分五釐以上至二分大小不等約計每張值銀二分統等各不合估作一分王機亦又揀要一色大皮每張各值銀二分五釐以致王祿等買皮二百張每張賠銀一分五釐除給前銀二兩仍共賠銀三兩本年十月內統將買完前皮并剩銀三兩差今在官老人高俊解送文布政處驗得皮好價輕仍將剩銀三兩令高俊帶回本縣給與王祿等領補原賠銀兩訖弘治十六年正月失記的日文

布政又因本家要做皮襖亦明知繫監臨官不該發價
下縣買物因查已問革今在官本司候缺吏魏勝繫本
縣人不合就差本役費銀一十兩仍發與統易買不拘
大小羔皮五百張統不合又拘皮行王祿等二十三名
并先問發今在官皮匠晁安到縣驗皮大小給價照數
買完大約每張用銀二分不曾賠償魏勝在縣親收不
合每皮一張乘機索要王祿等銀一分共索銀五兩入
已統不合不行具申究治仍差高俊同魏勝將皮解送

文布政收用本年五月初八日文布政因前買皮張破壞數多不敷做用不合又將銀二兩付與先問革今已故候缺吏竇景暘賚送與統不合仍照前價行拘王祿等二十四名給買羔皮一百張竇景暘在縣親收亦不合倣倣魏勝于王祿等名下每皮一張索要銀一分共索銀一兩八已統亦不合不申究就差今在官醫生邊錫同竇景暘將皮解送文布政收用訖本年十二月初二日有按察司見任僉事胡經出巡不在伊未到官義

男胡清不合將銀一兩四錢差已問發今未到皂隸姚
旺并弘治十七年四月失記的日有本布政司右布政
使今陞貴州左布政使致仕陳孜未到官男陳大綱不
合將銀二兩使令先問發今未到皂隸呂岩各亦不合
依聽將銀賫送統處又不合仍拘王祿等二十四名各
照前價將胡清銀一兩四錢買大小羔皮七十張令差
在官老人王昶送與胡清陳大綱銀二兩買大小羔皮
一百張亦差王昶送與陳大綱各收用彼時胡經陳孜

各亦不合失于鈐束本年閏四月內又有不知姓名二人稱係吏部馬尚書舍人馬須巡撫大同都御史舍人劉瓚各來本縣收買筏木因無皮襖不合共將銀三兩央浼統不合依聽替伊亦拘王祿等收買羔皮三百張每張虧價銀一分共虧銀三兩本年六月二十九日王志善思得父子三人俱充皮行負累不過將情告蒙巡按季御史將統等行提取供案發按察司掌印副使張黻究問行提王機等到司王祿并欽等各因上司節次

發價買皮要得乘機阻絕不合將各起皮價任意高擡
內將先次每張值銀二分五釐擡作三分五釐妄招文
布政虧價五兩後次每張值銀二分擡作五分或四分
妄招文布政一次虧價一十五兩一次虧價二兩陳大
綱虧價三兩等虛詞在官副使張黻亦不合失于詳審
輒便依供問罪呈蒙李御史先將統與魏勝等各依擬
發落次將文布政等備招叅奏間文布政先已陞任都
察院右副都御史巡撫延綏等處地方聞知前情不甘

要得改行隔別衙門弔取布政司所收時價冊籍查審
分辦又不合不行從實奏訴添捏先買羔皮之時訪得
民間出賣每張不過價銀半分及查咸長二縣時估每
羔皮一張值銀二分據此給價今聞御史季春勢逼孟
統等取供似有羅織之意及訪得季春舉止浮躁行事
妄為動輒作威沽名等項虛詞混同具本奏行間又該
通政使司連狀送據吏部馬尚書家人馬浦告稱本族
各門並無馬須名字亦無差人陝西買木等情俱送都

察院連季御史叅奏前情併行督理馬政今巡撫陝西楊都御史處勘問蒙行布政司及轉行西安府并咸長二縣各查無弘治十五九等年月分時估冊籍止將以後各月時估文冊并行陝西按察司提解間遇蒙弘治十八年五月十八日赦宥蒙將統等解送本院查無羔皮一張值銀二分時估在冊及審據王祿等各供前情當將承差王機供明省發馬須劉瓚另行外將統等取供連人劄發本司再行審問明白如果所供是實依律

議擬備招回報干礙應叅官員具實叅呈前來依蒙將
統等連日查審與供相同取問罪犯王祿等二名招同
魏勝等八名供同議得孟統王祿并欽所犯合依不應
得為而為之事理重者律減等各杖七十孟統繫官王
祿并欽俱民俱犯在革前免科與先問結魏勝供明王
志善王泰王名高俊邊錫王昶晁安各發還職寧家生
理照出供明高俊等七名與先問結魏勝俱免納紙孟
統官紙王祿并欽俱民紙各一分照到折米發咸陽縣

追送預備倉上納以備賑濟取實收附卷文貴陳孜張
黻胡經陳大綱胡清俱遇革人合免叅提備招連人呈
解到臣查得先為官買擾民事該巡按陝西監察御史
季春奏稱都御史文貴節次低價易買羊羔皮張數多
致累小民賠償二十餘兩右布政使陳孜僉事胡經各
縱家人低價于部內買物畧無禁止所據各官俱合有
罪等因奏本該通政使司奏奉欽依都察院知道欽此
續該都御史文貴奏為分理誣枉事開稱御史季春勢

通孟統等取供似有羅織之意及訪得季春舉止浮躁
行事妄為動輒作威沽名等情亦該通政使司奏奉欽
依法司看了來說欽此又該吏部尚書馬文升家人馬
浦告為分豁事開稱本族各門並無馬須名字亦無差
人陝西買木等情俱該都察院議擬覆奏併行臣提調
叅奏內有干人卷到官從公審勘務要的確明白有罪
人犯依律照例施行馬須劉瓚如已回還宜從移文河
南巡撫衙門追勘各犯正身是否假充詐取備由連人

解報歸結果礙應叅官員重別據實具奏究問等因題奉欽依是欽此欽遵備行前來除馬須劉璣移文河南巡撫衙門追勘正身歸結及行據陝西按察司呈解犯人孟統等到臣審取供詞發仰問報去後今問前罪除查相同及將孟統等准擬發落外叅照陝西布政司先任左布政使今陞巡撫延綏都察院右副都御史文貴明知係是監臨官員不合節次發價于所部內易買羊羔皮張數多事發却又奏辯不實本布政司先任右布

政使今陞貴州左布政使致仕陳孜陝西按察司僉事
胡經各不合失于鈐束以致家人在于按屬買物本司
署印副使張黻既承勘問事情亦不合失于詳審致不
輸服俱屬違法律合提問但文貴陳孜俱在任犯罪去
任事發與張黻胡經又俱係遇革人數伏乞聖明裁處
緣文貴係在京堂上官陳孜致仕與張黻胡經俱係方
面官及該奏奉欽依行令審勘據實具奏事理未敢擅
便謹題請旨

一為邊務事

題為邊務事照得本年十二月二十日以來邊人擁衆大舉深入搶掠聲言要搶各苑官馬自豫旺城至黑水口處處有兵聯絡結營本處官軍數少固原備禦官領軍五百名在石硤口紅古城按伏指揮任璽管領備冬馬步官軍九百餘員名在豫旺城按伏指揮郭邈管領土達八百有餘并新任遊擊陳善調集遊兵纔得二千餘員名在于鎮戎所俱被攔路阻截不相應援臣與新

任鎮守署都督曹雄聞得已入靜寧隆德會寧等處恐其東寇平鳳即時提兵西上臣在隆德駐劄曹雄領兵隨路勦殺追截本月二十四日已屯聚於隆德縣西三十里因見我兵奄至退回大營緣曹雄所領官軍纔得九百餘員名已差人乘夜間道調取陳善郭邇會合并量掣蘭州守把河橋官軍李佐等前來策應各該將士感恩圖報人懷鬪志但彼衆我寡以一當百未敢必其成功查得先為預防邊患以保固地方事該臣題稱寧

夏花馬池興武營直抵高橋三百餘里地方在北即為
犯我邊境之門戶蓋寇之所入雖由寧夏而其所利實
在腹裏寧夏邊牆如能捍禦則腹裏可安枕而卧儻一
旦折牆而入必以精騎守所入之路綴我官兵使不敢
南則腹裏安危所繫至重彼既深入剽掠方張之勢恐
非陝西官軍所能當必藉諸邊鎮遊兵協力捍禦然欲
成克捷之功必在乘其既弊而於中路擊之為便該本
部覆奏查得先該寧夏鎮巡官太監葛全等題為大寇

入套請兵防禦事本部議得合無鋪馬賚文與寧夏太監葛全總兵官李祥都御史劉憲一面選差車覺夜不收遠為哨探一面嚴督副總兵衛勇叅將霍忠協同保勦守備焦洪都指揮韓斌等各用心設策整搦人馬隨宜按伏以逸待勞本部仍行延綏守臣令叅將王戟統領土兵前往花馬池遊擊將軍姜漢統領遊兵前往定邊營曹雄統領奇兵前往寧塞營各要星馳前去秣馬按伏聽候有警併力截殺及行巡撫陝西都御史楊一

清公同固原新任鎮守將官斟酌形勢計議方畧分布
腹裏人馬據要防守督調本處遊兵相機策應等因題
奉欽依通行欽遵及看臣所奏與前項議奏之意大畧
相符合無行移延綏鎮守等官轉行副總兵遊擊等官
查照先今事理如果已西行本鎮別無聲息陝西來
調兵馬即便依期前去布分防守不許遲延誤事自取
罪尤仍通行陝西寧夏延綏鎮巡等官俱要協心運謀
相機而動務使功成萬全事無一失圖免陝西腹裏之

害用紆皇上西顧之憂毋得秦越自分坐觀成敗以孤
委任等因題奉聖旨是便行與各官著同心協力相機
防禦不許自分彼此致誤事機欽此欽遵本年十二月
二十一日備行到臣切緣寧夏鎮巡等官與臣先後論
奏之意正恐大敵入套窺伺腹裏寧夏地方軍馬寡弱
不能捍禦故乞早調延綏遊奇兵馬叅將王戟土兵併
力布置按伏保固邊牆不令入境及查得先于本年十
一月十七日據定邊營把總都指揮閻綱呈據走回男

子張智說稱達衆四營約有二萬入套要搶固原等情已經具題及行延綏巡撫都御史文貴催調遊兵并行寧夏巡撫都御史劉憲轉行各邊遇有入套聲息差人飛報去後本年十二月十三日臣差人于花馬池等處探問並無原擬延綏人馬到邊想因延綏遊奇兵叅將王戟土兵俱自大同初來未得休息且恐原奉旨意公文到遲又各該將官新舊交代事勢使然決非敢為延緩又查寧夏花馬池等處亦不曾傳報在套近邊的實

消息今前項大寇忽然擁衆拆牆突入腹裏已遵照成
命急調延綏遊兵土兵前來截殺及中路邀擊之議通
行賁文延綏副總兵姜漢寧夏總兵官李祥等會合行
事但道途阻滯文移往來彼此牴牾事勢可否猶未可
知臣切詳此時已逼新春尚在腹裏恐渡河不及其志
必將恃其大衆潛伏套中夏秋草飽馬肥時月又謀入
寇縱使出套過河冬間必復踵襲故智且陝西地方兵
苦于各邊之備禦民疲于三鎮之轉輸竭中土之力以

供外邊為其能為我藩籬也今花馬池大敵臨邊通不知覺雖有如無何所倚仗將來之事臣實憂之至于用兵機要似不出臣前所擬奏但事關各鎮若無總制重臣居中調度則甲可乙否終難濟事議論多而成功少無怪乎其然也伏望聖明垂念西土重地乞勅多官會議簡命在廷威望素著大臣前來總制陝西延綏寧夏甘肅等處軍務授以便宜賞罰之柄臣等各鎮巡三司以下官員悉聽節制無事在于慶陽駐劄有警前去環

縣韋州等處居中調度各路將官用命者賞不用命者
罰如身使臂如臂使指孰敢延緩以失事機如已經出
套速就經畧花馬池一帶邊務設何籌策可以保固邊
境使全陝西生民不致頻年大遭荼毒實宗社萬億年
無疆之休也臣備員巡撫不能遏其深入之機又論列
不早致有今日若復不言後患恐不止此臣不勝待罪
俟命之至緣係急處邊務事理未敢擅便謹題請旨

一為敵人擁衆大舉入境事

題為敵人擁衆大舉入境事准協守延綏等處地方副
總兵都指揮僉事姜漢手本弘治十八年十一月二十
九日准鎮守延綏總兵官張安手本准寧夏總兵官李
祥手本前事內開徵調遊奇二兵照依原擬信地駐劄
以俟應援等因准此本職統領榆林以西兵馬于本年
十二月十一日到寧塞營按伏駐劄本月十八日申時
據定邊營把總都指揮閻綱差夜不收葉章報稱花馬
池敵衆臨邊拆牆備報得此本職隨統前項官軍二千

二百四十五員名到萌城伏兵駐劄二十七日寅時本
城傳報煙火隨差夜不收馬福等前去石子溝等處爪
探襲見蹤跡掠獲頭畜往北行走備報到職親率官軍
追至隰寧堡地名大千戶井等處前敵約有一百餘騎
見我官軍馳驟奔急聲勢勇猛將搶掠頭畜盡行棄擲
易馬北遁復追二十餘里因見天晚黑暗恐墮奸計隨
即收兵將所獲頭畜至隰寧堡行委指揮薛麟備查知數
發仰守堡百戶劉亨暫令收候已經開報外三十日酉

時承准陝西都御史楊一清手本為預防邊患以保固
地方事查照原文作急統領兵馬兼程前來萌城石溝
等處按伏會合寧夏總兵官李祥副總兵衛勇等人馬
哨探截殺緣由已經備行知會外本日戌時亦准寧夏
總兵官李祥手本為軍務事開稱本職所統人馬移于
韋州等處會叅將王軼遊擊戴欽餽飼馬匹遇敵併力
截殺等因准此依文正德元年正月初一日移兵韋州
駐劄本月初三日丑時該寧夏總兵官李祥差鄉導陸

寬等前來報稱大敵已于本月初二日未時俱從白塔兒往北去訖等因得此本職會同叅將王戟遊擊戴欽各領所部官軍從韋州起行奔馳到於地名紅寺兒地方爪得前蹤跡掃往北去已追襲到白塔兒迎遇總兵官李祥副總兵衛勇等人馬在彼追趕當同領好馬官軍馳騁襲蹤追趕三十餘里因見天夜風霧黑暗恐墮詭計總兵官李祥副總兵衛勇收兵石溝兒按伏本職等四更時分到小鹽池伏兵隨即會差百戶趙璽等帶

領夜不收二十名前去所經道路密切哨探至初四日辰時據本官差夜不收郭其馳報瞭見本處煙燉迤東有數十人騎牽馬匹往南瞭望據報得此當會叅將王戰為左哨遊擊戴欽為右哨本職中哨及會合守備都指揮侯勛指揮郭遡各統兵馬相繼而行到于地名石溝池迎遇前敵擺列攻敵職等申嚴號令督併官軍各用鎗砲弓箭一齊射打其衆潰亂就陣斬獲首級一顆奪獲戰馬二匹速督官軍追至火山迤北地名啞叭湖

等處又添伏兵三百餘騎糾合前衆一處衝擊前來職等親督官軍奮不顧身持刀向前劈砍又斬首一顆奪獲戰馬二匹軍士奪獲敵器共七十九件臨陣射死官馬三匹彼見我軍齊至換馬奔走北遁欲要窮追及因天晚況離花馬池邊牆不遠慮恐牆外救兵糾衆前來以此收兵回還至初五日天明到小鹽池仍差人於出入要路哨探遇警合兵截殺外查得獲功并當先重傷官軍另行造報今將節次就陣斬獲首級奪獲戰馬達

衆兵器等項差百戶曹聰先行解報為此理合開坐施行等因隨據延綏遊擊將軍戴欽呈弘治十八年十二月二十七日未時承准陝西巡撫都御史楊一清手本調卑職作急統領遊兵取便兼程從甜水堡下馬房等處徑赴固原豫旺城鎮戎所等處會合陝西遊擊將軍陳善領軍指揮郭邈等截殺承此卑職就于本月三十日到韋州本日申時承准都御史楊一清手本行卑職斟酌相機行事若已到豫旺城鎮戎所地方即便會合

本處遊擊將軍陳善等相機應援截殺若不曾前來就于石溝鹽池韋州等處會合寧夏主副總兵李祥等及延綏副總兵姜漢取便邀擊截其歸路共成大功承此于正德元年正月初二日到韋州初三日四更時分到小鹽池會差百戶趙璽等哨探初四日辰時本官差夜不收郭其馳報瞭見本處煙燉迤東有數十人牽騎馬匹往南瞭望當會副總兵姜漢叅將王戟及會合都指揮侯勛等各統兵到于地名石溝兒迎遇前敵擺列攻

戰職等申嚴號令督併官軍各用鎗砲弓箭一齊射打就陣奪獲敵馬三匹射死我軍馬二匹追至火山迤南地名啞叭湖等處又奪獲敵馬五匹敵器一百二十一件彼見我軍齊至換馬奔走等因又據叅將王戟亦呈相同開部下奪獲敵馬五匹敵器共二十四件緣由前來續准鎮守寧夏總兵官右軍都督府都督僉事李祥副總兵衛勇手本正德元年正月初一日夜丑時分據鳴沙州迤東棗山墩夜不收周翊同靈州擺撥夜不收

劉瑛報三十日未時瞭見敵衆精兵約有五六萬俱穿
戴明盔明甲張打旗號三路擺列臺營從地名石把都
來後面灰塵不絕又據紅寺兒夜不收潘闕一等報初
一日未時分瞭見地名虎巴山灰塵約長三十餘里亦
結營陣聯絡而行初二日申時分據哨探夜不收王洪
報未時哨見敵衆灰塵漲天結營行走從南往舊白塔
兒去訖當會同副總兵衛勇議看得敵勢十分擁衆擺
列營陣而行又兼天晚援兵不能猝至難以發兵一面

急差鄉導陸寬等飛調韋州按伏副總兵姜漢等人馬前來併力追殺戍時又據杏園墩擺塘鄉導陳演亦報本日未時瞭見敵衆灰塵從地名白塔兒東空過至黃昏時分未盡初三日黎明時分出兵副總兵衛勇人馬為左哨本職為右哨指揮楊瑛周冕統兵車繼後襲追中途遇據白塔兒墩瞭高小旗張英報初二日未時有寧夏差來夜不收徐禮保魏成爪探聲息到于本墩空被前哨敵衆殺死馬二匹搶去追至白塔兒後有延綏

副總兵姜漢遊擊戴欽叅將王戟人馬到彼會合襲蹤
追趕隨有固靖遊擊將軍陳善亦領人馬俱到地名貓
兒頭山因見天晚風霧昏黑難追彼衆我寡力不能支
恐墮詭計三更時分延綏兵馬往小鹽池本職等至五
更時分到石溝兒駐劄初五日節據靈州守備焦洪差
夜不收張華等報稱初四等日大衆韃靼從清水營木
井等墩空及花馬池原拆牆口出境去訖為此今將會
兵截殺緣由用手本前來知會施行等因到臣案照前

事先因大勢敵衆于弘治十八年十二月十七等日擁衆大舉深入固原隆德會寧地方搶掠缺軍禦敵臣遵照欽奉勅諭及兵部節該題奉欽依事理移文調取延綏遊擊將軍戴欽叅將王戟統領遊兵土兵前來腹裏應援副總兵姜漢統領奇兵會合寧夏總兵官李祥等人馬聯絡駐劄小鹽池石溝韋州等處邀截歸路因是道途阻滯遊兵土兵日久徵調不至本月二十九日據西安州海刺都操守指揮陳晟等差人走報前項敵衆

于二十七等日由西路麻張堡西安州錦雞口出境恐
前調遊兵土兵仍來固原緩不及事又經差人阻回行
令前去石溝鹽池一帶按兵密切會合寧夏主副將官
及陝西遊擊將軍陳善等官相機邀截已經具題外今
據前因照得前項敵衆自弘治十八年十二月十七日
擁衆大舉從花馬池地方拆牆進入分守叅將霍忠兵
敗被圍殺傷官軍數多遂至乘勝長驅深入腹裏搶掠
至正德元年正月初二等日從石溝鹽池兩界地方出

境雖經會行延寧二鎮將官合兵追截止是延綏副總兵姜漢奇兵斬獲首級二顆叅將王戟遊擊將軍戴欽人馬俱無斬獲又查得各官不遵兵部原擬到邊稽遲但係新舊將官交代之際況王戟當大寇入境之初衝鋒解圍有功于花馬池官軍實多戴欽弘治十八年十二月十六日方纔任事十七日隨即統領官軍啓行千里赴援未嘗後期寧夏主副將官李祥等各稱聲勢十分擁衆擺列營陣而行難以發兵緣事關各鎮中間事

機委曲非臣所能悉知除將姜漢等解到首級敵器看
驗收庫敵馬給軍領養及陝西官軍獲功誤事緣由俱
另行外緣大舉敵人出境客兵追截獲功事理謹題請
旨

一為謝恩事

奏為謝恩事近准吏部咨為才不稱任乞恩辭免巡撫
地方事該臣奏乞辭免巡撫陝西地方照舊督理馬政
等因奏奉聖旨楊一清才望素著簡命已定不允所辭

該部知道欽此欽遵案查先准兵部咨該本部題為大
寇拆牆入境事節該奉欽依是楊一清不妨督理馬政
就著巡撫陝西地方用心調度防禦邊患寫勅與他欽
此欽遵臣時聞命有驚措躬無所雖防禦之事竭力就
道不敢少緩而巡撫之任揣量度分終非所堪謹瀝愚
誠上千天聽未蒙俞允顧荷褒嘉愧與憂并榮非意及
伏念臣少蒙作育長被甄收弄筆墨者半生志有餘而
才不逮綴班行于三品年漸老而業無成且盛平之世

賢俊滿朝如臣之愚何足比數非惟膺拔擢之殊渥抑且受特達之深知天地之恩在人已極涓埃之報于國何施敢不勉竭庸愚用酬眷注經營士馬庶少裨修內據外之功撫安兵民期不負後樂先憂之學臣無任瞻仰感戴之至緣係謝恩事理為此具本謹具奏聞

一為災異自劾乞恩罷黜以回天意事

奏為災異自劾乞恩罷黜以回天意事案查先節據陝西布政司呈為地震事節據西安平涼慶陽等府朝邑

高陵固原環慶等州縣各申稱弘治十八年二三四六等月日時不等各地震響聲如雷搖動軍民房屋及據臨洮衛申為異風暴雨淹没人畜田禾事據右前後三所申稱各屯田地地方弘治十八年自四月初間一向亢旱夏田被晒焦枯本月二十八日夜偶然天昏黑闇大作惡風迅雷暴雨如注頃間洪水馳至約有二丈寨牆衝倒房屋傾塌男婦漂流渰死軍餘李彪等一十六名口馬牛驢羊等畜三百餘隻樹株拔根田禾淤墊又據

臨洮府申為山被猛雨雷震傾塌壓没人畜不見蹤跡
事據河州申本州俺哥里沙子溝地方坐南向北土山
一座弘治十八年六月二十三日夜忽被猛雨雷震山
塌將本山居住民人顏廣等三户人口男婦二十一口
并庄田頭畜等產俱被壓没又據本司呈為旱災等事
節據西安府申備邠乾等州咸寧長安等二十五縣各
申稱弘治十八年三月四月天旱無雨兼被狂風吹刮
所種麥豆不得堅實青乾無收六月初旬纔得微雨安

種秋苗自本月起至八月初旬一向亢旱無雨又兼狂風晝夜不息致將糜粟菽豆等苗各吹晒焦枯秋成無望人民十分饑荒陸續逃移趁食去訖又據延安府申備鄜綏膚施等一十九州縣慶陽府申備寧州安化等五縣鞏昌府申備階秦隴西等州縣鳳翔府申備鳳翔岐山等縣臨洮府申備蘭金等州縣又節據西安左前後延綏平慶臨鞏甘蘭等衛各呈前事相同等因節呈到臣切見陝西各府州縣今年二月以來地震山傾之

變屢見于敵人出沒之區夏旱秋乾之災遍滿于關輔
根本之地節經具題及行各該官司踏勘撫恤外臣聞
天人相為流通休咎關乎得失故未有不召而自至之
災亦未有已出而無應之變陝西災異迭見是皆生民
愁苦之象兵戈擾攘之徵不早圖修改將禍患難測仰
惟皇上龍飛御極之初恩澤覃布庶政肅清是宜海嶽
効靈雨暘時若凡此咎徵責在臣下以一方論之軍民
各有攸司大小各有專職而綱紀之任實係巡撫災異

之來皆由巡撫不職所致洪範曰王省惟歲卿士惟月
師尹惟日蓋以休咎之輕重繫職任之大小也臣本庸
愚濫膺重寄既非安內攘外之才又無揚清激濁之勇
見賢不能進見不肖不能退知民之害不能祛知民之
困不能救上下交征不能革公私匱竭不能補以致軍
民怨咨感傷和氣陰陽愆伏動靜乖違巡撫方逾半年
災異遍乎一省上天示譴罪實在臣且食人之食者事
人之事陳力就列不能者止臣今名浮於實處非其據

事不稱食心有未安顛而不扶焉用彼相伏望聖明體
天行罰乞將臣罷歸田里別選相應之人巡撫陝西地
方必能扶持綱紀綏輯兵民彈壓羣邪肅清弊政庶幾
天意可回化災為祥轉禍為福不難矣緣係災異自劾
乞恩罷黜以回天意事理未敢擅便為此具本謹具奏
聞伏候勅旨該吏部官欽奉聖旨陝西地方多事巡撫
正要得人楊一清不准辭著用心辦事欽此

一為謝恩事

奏為謝恩事正德元年正月二十七日節該欽奉勅諭
朕即位之初念爾等効職勤勞宜有頒賜以隆恩典爾
其體朕至意益盡忠誠用副委任欽此欽遵九霄垂露
勅降天文萬里飛輶物頒御帑歡聲所動邊徼增輝恭
惟皇上誕膺休命光紹丕圖慶洽普天恩覃率土臣身
以職羈既阻天廷之拜寵緣例得遂承帝賚之加絲綸
春溫金帛霞爛雖雲雨之施在物無遺而渥澤所流于
臣為幸榮加慶外感在懼中捧而珍藏實抱無功之愧

服以拜賜徒深逾分之憂謹當以金自盟焚灼不渝其
性顧服恩稱曳婁誓委其身臣無任瞻仰感戴激切屏
營之至除將賫捧到欽賞銀十兩紵絲二表裏望闕叩
頭領受外緣係謝恩事理為此具本謹具奏聞

一為乞恩認罪罷黜以謝地方事

兵部覆該本部職方清吏司案呈奉本部送于兵科抄
出巡撫陝西等處地方兼督理馬政都察院左副都御
史楊一清奏臣本孱愚誤蒙先帝聖恩擢任憲職督理

馬政弘治十八年正月內為因大敵拆牆入境節該欽奉勅諭不妨督理馬政巡撫陝西等處地方欽此欽遵自度不堪負荷具本辭免未蒙俞允勉強供職臣遭際殊常寵榮踰分誓竭駑鈍仰酬眷知奔走驅馳不敢自怠竊見固原地里寬漫處處通敵最為難守先該總制尚書秦紘修築邊塹一道踰時閱歲湮廢已多又防守無兵墩堠不接雖有如無不堪保障臣督令守臣修補完備依塹添墩傍險增堡定為烽火號令招集土人使

隨便捍禦臨冬時月會同鎮守太監等官分布人馬據要防守復慮一方兵政廢弛名存實亡剝削之餘困敝已極昧死上陳仰荷廟謨獨斷易置主將增設遊擊方將一新紀律期收戰守全功不意大敵乘凍渡河潛伏套內逼近花馬池地方彼處將官通不知覺弘治十八年十二月十七日衆號數萬自花馬池清水營兩處折牆進入守將兵敗被圍虧折官軍致乘勝長驅直入腹裏隨即收斂隄備我軍迎戰衆寡不敵不能遏阻敵至

固原野無所獲本月二十三日遂深入靜寧隆德會寧
地方搶掠鎮守署都督僉事曹雄止領官軍九百餘員
名尋襲蹤跡截殺臣恐孤軍無援急調延綏遊兵土兵
及本邊官軍前來會合策應道途阻隔兵難猝集已於
本月二十七等日遽從西安州地方出境邀之不及臣
又約會寧夏主副將官延綏遊奇兵馬邀之石溝鹽池
諸將以聲勢重大莫敢發兵坐視其出竟無功查得固
原環慶一帶並無所失監苑官馬幸得保全此皆仰仗

宗社神靈朝廷威福敵兵遄歸被禍猶淺但靜寧隆德
會寧三處搶掠殺傷人畜數多已行各該州縣查數未
報陝西官軍節與交戰斬獲首級不多幸不虧折惟乾
鹽池操守官張瑛等墮其奸計陣亡一十八人除將寇
衆入境出境日期官軍誤事獲功緣由節經會題及搶
掠人畜的數查明另行外照得鎮守太監劉雲常在固
原駐劄署都督僉事曹雄初到固原地方臣叨任巡撫
已及一年經畧調度乃其職業況受恩深重言聽計行


欽定四庫全書

卷六

比之各路撫臣不同奈何器質庸凡智慮疎淺未諳軍旅之務實無安攘之才以致大敵擁衆長驅侵掠為患拆牆而入既不能遏其初來之鋒得利而去又不能截其既歸之路藩籬失守雖花馬池之過而內有邊防不能自固咎將誰執領兵出戰雖各將官之事而遇警徵調多不及期責亦難辭上不能寬九重西顧之憂下無以慰一方軍民之望臣委的有辜委任罪當萬死且今大寇去留邊情緩急俱未可測臣誤事貽患之人誠宜

早正法典罷歸田里別推才力有餘者巡撫經畧則凡受任方隅皆知警戒能者竭力自効不能者無地自容矣等因具本該通政使司官奏奉聖旨楊一清已命總制彼處邊務著盡心供職以圖後効不必引咎求退該部知道欽此欽遵抄出送司查得先為邊務事該本部會官具題節該奉聖旨是楊一清著總制陝西延綏寧夏甘肅等處邊務兼督理各該地方馬政欽此已行欽遵去後今該前因案呈到部看得本官巡撫陝西經畧

有方威望素著近雖被敵深入緣無損傷大重輒乃自
陳誤事之人欲正罷歸之典既查有本部已經會官題
奉總制成命及今欽依勉留事理難再別議合咨前去
煩為查照欽遵施行



關中奏議卷六